

leege mer vun do ënne gewénkt hunn an ech gesinn, ech soll mech op mech selwer verloossen an net op dat, wat ech matgedeelt kréien.

■ **M. Henri Grethen** (DP).- Zumools vun de Kolleege vun der eegener Partei.

■ **M. le Président**.- Voilà, ganz genau.

■ **M. Mars Di Bartolomeo**, *Ministre de la Santé et de la Sécurité sociale*.- Merci, Här President. Ech wollt just, éier ech zum Schluss kommen - an de President gétt mer nach zwou Minutten - soen, dass een Element extrem wichteg ass an der Diskussioun iwwert de Sida, dass een se net kann op den nationale Plang oder souguer op den europäesche Plang limitéieren.

D'Lutte géint de Sida ass eng, déi sech éischtens op de Beräich Santé an zweetens op de Beräich Kooperatioun, op den nationale Beräich, op den europäesche Beräich an op den internationale Beräich muss konzentréieren an dofir, zesumme mam Kolleeg Jean-Louis Schiltz, hu mer eis während deene sechs Méint, déi mer haten an der Présidence, drop konzentréiert, fir aus dem Sida alleréischtt prioritär Themen ze maachen an deene Conseilen, déi mer presidéieren.

Am Conseil vum Développement am Juni wäert de Sida als ee vun den Haaptpunkte stoen. Och am Conseil vun der Santé am Juni wäert de Sida als ee vun deenen Haaptpunkte stoen. An do wou mer wierklech frou doriwwer sinn, um Ofschloss-Sommet wäert de Sida als ee vun de prioritären Theme stoen, well nëmme wa mer géeeent iwwer Santé, iwwer Kooperatioun - wéi den Här Huss och richteg ënerstrach huet - awierken op déi dote Krankheet, dann hu mer eng Chance se an de Grëff ze kréien.

Well och wa mer déi erfollegräichst Campagnen hei zu Lëtzebuerg hätten, kënnen mer déi Krankheet net an de Grëff kréien, ouni d'Haaptinfektiounsherde ronderëm d'Communautéit an an den afrikanesche Länner duerch konsequent Politik ze bekämpfen. An dat ass nëmme méiglech duerch e fräien Accès zu de Medikamenter, duerch Preventioun an d'Bekämpfung vun den Ursaachen, déi dozou féieren, an do haaptsächlech d'Ënnerdréckung vun de Fraen an deene Länner.

Här President, Dir Dammen an Dir Hären, mir wäerten an deenen nächste Wochen den Aktionsprogramm fir de Kampf géint de Sida finaliséieren a mer hoffen och, dass mer Ënnerstëtzung kréien, fir dann éischt Akzenter an de Budget vun nächste Joer eranzekréien. Well, wann een esou een Engagement mécht, da geet dat sécherlech net ouni déi noutwendeg Mëttelen. Och wa mer an deene leschte Jore ganz vill dran engagéiert hunn, mussen mer eis d'Mëttelen gi fir méi eng cibléiert Virgangsweis.

An deem Sënn soen ech lech ee ganz häerzleche Merci an och Merci, dass Der dozou bäigedroen hutt, dass mer eppes Wichteges maachen, dass mer an de Käpp vun de Leit déi falsch Message verhënneren, nämlech déi, dass den Aids ze banaliséiere wär, dass en heelbar wär, mä dee richteg Message ginn, dass den Aids nach wie vor eng vun deenen déidlechste Krankheeten ass an dass mer eis deementspreechend mussen verhalten.

Ech soen lech Merci.

■ **Plusieurs voix**.- Très bien.

■ **M. le Président**.- Merci, Här Minister.

Da komme mer zum nächste Punkt vun eisem Ordre du jour, d'Diskussioun vum Projet de loi 5419, eng Konventioun iwwert d'Bekämpfung vum Tubak. D'Riedezäit ass nom Modell 1 festgeluecht an et si bis elo ageschriwwen: d'Madame Mar-

tine Stein-Mergen, den Här Betten-dorf, den Här Huss an den Här Jaerling. D'Wuert huet elo de Rapporteur vum Projet de loi, déi honorebel Madame Lydia Mutsch. Madame Mutsch!

2. 5419 - Projet de loi portant approbation de la Convention-cadre de l'OMS pour la lutte anti-tabac, faite à Genève, le 21 mai 2003

Rapport de la Commission de la Santé et de la Sécurité sociale

■ **Mme Lydia Mutsch** (LSAP), *rapporteuse*.- Merci, Här President. Dir Dammen an Dir Hären, och wann ee Rapporteur ass iwwer ee Gesetz iwwert d'Fëmmen, dann heescht dat net, an dat war och e bëssen den Tenor an der Gesondheetskommissioun, dass een heihinner soll komme fir en Discours ze féieren iwwer Fumeuren oder net Fumeuren. Et heescht och net, dass ee sech méi un d'Adress vun deenen engen oder vun deenen anere soll riichten. An et heescht och net, dass ee soll hei grondsätzlech Iwwerleeungen iwwer Toleranz, Fräiheet, Respekt oder gudder Wëlle féieren, dat gehéiert eigentlech méi an eng Ethikskommissioun wéi an eng Gesondheetskommissioun, a mir si jo als Gesondheetskommissioun hei befaasst mat deemem Projet. An dee Projet huet als Kader eng Konventioun, déi mer haut solle mat eisem Vote ratifizéieren.

Et ass e bëssen eng exceptionell Konventioun, well et ass eng vun der Organisation Mondiale de la Santé, déi hir Base juridique an den Traitéen vun der Europäescher Unioun huet. Et ass e weltwäiten Traité, deen éischten a sengem Genre. An en huet eng erkläerten Absicht, eng duebel: fir Mënscheliwwen ze retten a fir Krankheeten ze verhënneren, wann een et ganz global wëllt betruichten.

D'Doktesch Gro Harlem Brundlandt, déi d'Generaldirektioun hat, wou déi Kaderkonventioun 2003 hei zustane komm ass, an déi mir als Lëtzebuerger de 16. Mee 2003 ënnerzeechent hunn, huet et op de Punkt bruecht: «La convention marque un réel tournant dans le domaine de la santé publique. C'est aussi un tournant dans la collaboration internationale à l'heure de la mondialisation. Ainsi, les pays collaborent systématiquement pour protéger la vie des générations présentes et futures.»

Dat ass jo net näischt als Absicht, well ëmmerhi geet et ëm net méi an net manner wéi e weltwäite gemeinsame Gesondheetsplang, deen éischten an deem Genre, ech hunn et scho gesot, deen e gemeinsamen Effort vun alle Länner viraussetzt fir d'Bekämpfung vun engem weltwäite Problem mat fatalen Auswierkungen.

Bis elo hunn 62 vun 168 Länner dës Konventioun ratifizéiert - ech gi vläicht och do nach mat de leschte Chiffere vum Minister liicht korrigéiert, mä et geet awer an déi dote Richtung -, eng Konventioun, déi Auswierkungen huet op ganz vill Beräicher: Gesondheet, Soziales, Sanitärproblemer, wirtschaftleche Kontext an ëmweltpolitesch Problemer, déi domadder verbonne sinn. A wann een tatsächlech d'Ausso mécht, dass een hei e gemeinsamen Effort weltwäit mécht, dann huet een et wahrscheinlech och mat enger Saach ze dinn, déi et justifiéiert firwat een hei mat hir ëmgeet, wéi wa se eng Epidemie wier; vläicht gesi mer et jo och als Epidemie. Well tatsächlech gétt jo gesot, dass den Tabagisme „la plus grande cause de maladies et de morts évitables“ vun eiser Zäit ass.

Chifferen, e puer just: 1,3 Milliarde Fumeure weltwäit, 13.500 Doudeger all Dag, fënnf Milliounen Stierffäll elo schonn a wann et esou weidergeet an deem Rhythmus, da sinn et der 2020 zéng Milliounen all

Joer, ee vun zéng Erwuessener stierft dodrunner.

Normalerweis, an et läit e bëssen Zynismus an där Ausso, loosse mir eis hei zu Lëtzebuerg jo net mat Zuelen esou beandrocken, déi weltwäit sinn. Ob dat d'Kannerstierflechkeet oder den Hunger oder den Tubak ubelaangt, do si mer nawell meeschtens net onheemlech alarméiert dodriwwer, an och hei wann ech gelift den Zynismus berücksichtegen, zumools wann ëm déi 70% vun deene Stierffäll net an eise Breitegraden, mä an den Entwécklungslänner stattfannen.

Dofir, wann dat heiten nach net duergeet, baséiert op den Appel un d'Décideuren, dee mer ufanks des Joers kritt hunn am Numm vun der Fondation luxembourgeoise contre le cancer, déi sech mat enger ganzer Rëtsch vu Milieuen aus dem Gesondheetswiesen zesummegegessch huet, d'Chifferen hei zu Lëtzebuerg, opgrond vun enger Etüd, déi ufanks des Joers duerchgefouert ginn ass:

Ongeféier 36% vun de Männer hei zu Lëtzebuerg fëmmen, ongeféier 26% vun de Fraen. 5 bis 600 geschätzte Stierffäll, déi reng, awer wierklech reng, op den Tubak zrëckginn, ouni déi vill Krankheetsfäll opgrond vum Tubak ze erwähnen. An ee vun dräi Kriibsfäll, dat ass och elo scho gesondheetlech wëssenschaftlech ermëttelt, geet op d'Fëmmen zrëck. Oder wann een et nach méi op Jugendlecher wëllt bezéien: bei deene vu 15 bis 17 Joer sinn ëm déi 24% ofhängeg, a bei där Kategorie vun 18 bis 24 Joer 47%. Am Klostext: Bal al zweete Jugendlechen tëscht 18 a 24 Joer fëmmt méi wéi 20 Zigarette pro Dag.

Oder wann een et nach méi kloer wëllt soen, da beziit ee sech op eng méi grouss ugueluechten Enquête vun der Weltgesundheitsorganisatioun, déi a verschiddene Länner duerchgefouert ginn ass, zum Beispill och bei eisen däitschen Noperen 2003.

Déi Chiffere sinn eigentlech ëmsou méi dramatesch, well an deene Statistiken, bei deene vu 15 Joer un, sinn en Deel vun hinnen einfach nach guer net mat dran, well do hu mer nämlech Statistiken, dass 10% vun de Jugendlechen, déi tëscht 12 an 13 Joer al sinn, scho Fumeur sinn. 10% vun deene Jonken tëscht 12 an 13 Joer si scho Fumeur an eisem däitschen Nopeschland. Ech kennen d'Chifferen net vu Lëtzebuerg, mä gleeft mer, se sinn net vill aneschtens. Dee Chiffer klëmmt op 29% bei deenen, déi tëscht 14 a 15 Joer al sinn, an op 44%, also do komme mer scho gutt erun u geschwënn 50%, vun deenen, déi 16 bis 17 Joer al sinn.

Ech wëll elo net un d'Gefiller hei appelléieren, mä vill vun lech hu jo Kanner, da wësst Der wat dat be- deit.

An den duerchschnëttlechen Astiegsalter an d'Fëmmen läit bei 13,7 Joer.

13,7 Joer, wësst Dir wéi kleng se nach si wa se 13 Joer hunn? Da fänken se ebe schonn u mat fëmmen. An et gétt och geschat, dass e ganz groussen Deel vun hinnen, an do kommen ech dann nach eng kéier zrëck op déi Chifferen, déi ech hei fir Lëtzebuerg genannt hunn, wa se bis 18 Joer sinn, schonn d'Halschent vun hinnen ofhängeg si vun den Zigaretten, also méi wéi 20 Zigarette pro Dag fëmmen.

Huet dat elo vill mat Loscht ze dinn, mat Fräiheet, mat Respekt, mat Toleranz? Ech weess et net. Well ëmmerhi soen der zwee Drëtzel vun hinnen, wa se 18 Joer hunn: „Hätt ech nëmmen ni ugefaangen.“

Dat ass vläicht awer eng Ausso, déi mer eis sollten zu Häerz huelen, wa mer déi ganz sentimental Diskussioun ronderëm d'Loscht féieren, loosst se dach gewäerden. Also wann et do ugeet, ech mengen do ass déi doten Diskussioun net appropriéiert, zumools wou och eng ganz Drogeproblematik drunhänkt. Ech wëll domadder bei- leiwe net d'Ausso maachen, dass all Fumeur herno och bei deene méi haarden Droge lant, mä et ass awer bekannt, dass Tubak eng Astiegsdrog ass, zesumme mat aneren, wéi och den Alkohol bei- spillsweis. An déi, déi eng klas- sesch Drogecarrière duerchlafen, fir et mol esou ze nennen, déi hu ganz oft mat béidem kombinéiert ugefaangen.

Dat heescht, et sollt een et och als Drogeproblematik astufen an och net zécke fir dat ze maachen, an doraus ergëtt sech da vill méi wéi eng Diskussioun ronderëm de Respekt oder d'Toleranz, eng Diskus- sioun iwwert d'Obligatioun, déi mer hunn, an och eng Diskussioun iwwert d'politesch Handlungspriori- téiten.

Dës Kaderkonventioun, wa mer déi haut approuvéieren, dann ass dat méi wéi just soen, elo hu mer eis mol e gudder Kader gesat, mä da sinn dat eng Rei vun Obligatiou- nen. Et ass virun allem en Engage- ment, fir d'Approbatoun vun dëser weltwäiter Konventioun, déi zënter Februar en vigueur ass, als Lëtze- buerger aktiv ze begleede - mam Akzent op aktiv - an zweetens fir eis op legislativem Plang déi Ins- trumenter ze schafen, déi eis et och erméigleche fir aktiv ze ginn.

Ech wëllt nach gären eng kéier rappeléieren - vläicht ass dat an deene leschte Méint bei den Dis- kussiounen oft vergiess ginn -, dass mer haut schonn e Gesetz hunn iwwert d'Fëmmen, an zwar e Gesetz vum 24. März 1989, dat ëmgeännert ginn ass de 6. Januar 1995. Et ass e Gesetz «portant res- triction de la publicité en faveur du tabac et de ses produits, et inter- diction de fumer dans certains lieux».

Firwat vergiesse mer et? Et géeng ee mengen, mir géingen elo bei null ufänken. Ëmmerhi steet awer schonn am Kapitel 2, Artikel 9 vun deem Gesetz do ganz däitlech, dass en Deel Fëmmverbuet an de Spideeler géllt, an de Schoulge- baier, an de Sportshalen, an de Bi- bliothéiken, an de Muséeën an esou weider an esou fort. Dat ass also elo näischt Dramatesches, wa mer elo nei d'Diskussioun nees ukuerbelen, wéi eng Lieux publics dozou solle gehéieren.

Dat ass wuel och den Hanner- grond, op dee mir eis haut baséie- ren, mat eisem heitege Wëssens- stand, mat deenen Erkenntnisser an der Gesondheetspolitik, déi mer haut hunn - zum Beispill wat d'Kriibsfuerschung ubelaangt, zum Beispill wat déi dramatesch Entwécklung mat ëmmer méi jonke Fumeuren ugeet, zum Beispill wat gesondheetlech nogewise Gefore beim Passivfëmmen op der Aar- bechtsplaz sinn, an zum Beispill wat d'Wierkung ass vun deenen ëm déi 4.000 chemesche Substan- zen, déi an enger Zigarett enthalte sinn, op den Organismus vum Mënsch - an duerch déi mer domat eng Obligatioun hunn, fir eis Légis- latioun net nëmmen unzepassen an ze ergänzen, mä fir se ganz dréngend ze adaptéieren an nach weider auszubauen.

Et ass e ganze Mix vun Handlungs- felder, déi hei ugeschwat sinn. Zum Beispill de Schutz vun de Mineu- ren, d'Verbuet vun der Publicitéit, dat zum Deel och schonn am Arti- kel 4 vum Kapitel 1 vum 95er Ge- setz zrëckbehale gouf, d'Verfüg- barkeet vun den Zigaretten - iwwer Automaten drukommen, an de Geschäfte, wéi gi mer domadden ëm? -, d'Protektioun vun den Non- fumeuren, net nëmmen op der Aar- bechtsplaz, d'Präisser vun den Zi- garetten, d'Tubakssteuer, Stéch- wuert Begleedung vun de Fumeure

beim Entzuch, d'Roll vun eise Krankeese beispillsweis an och d'Produktreguléierung a vill anerer nach.

Wat de legislative Kader betrëfft besteet also Handlungsbedarf, an zwar dréngenden Handlungsbe- darf, wat gläichzäiteg heescht, dass dann och en dréngenden Diskussions- an Handlungsbedarf ass fir ënnereneen eng kloer Posi- tioun ze kréien. De Minister huet jo schonn zesumme mat aneren Ac- teuren domat ugefaangen an dat ass och richteg esou.

Mir brauchen also eng Rëtsch vun Adaptatiounen zu eiser Législa- tioun. Mir brauchen awer och eng Rei vun neie Gesetzter, zum Beispill e Gesetz iwwert d'Steier- an d'Präispolitik am Ëmgank mat den Tabaksprodukten. Do sollte mer op- passen, dass mer bei Adapta- tiouns- a Kompensatiounsfroe keng falsch Akzenter setzen, we- der gesondheetspolitesch nach sozialpolitesch - Stéchwuert Index. Hei mussen mer Kohärenz bewiese bei deenen Décisiounen, déi mer huelen, soss kann dat nees genee an de Géigendeel vun deem ëm- falen, wat mer eigentlech gären hätten.

Da brauche mer och e Gesetz iwwert d'Restrictiounen an d'Ver- buetsbestëmmungen, wat d'Vente vun de Produiten ubelaangt, virun allem och bei deene Keefer, déi vun eise Grenzen aus erakommen. Do hänkt jo e ganze wirtschaft- leche Piler un där Vente drun. Dann och e Gesetz iwwer repressiv Mesurë géint de Commerce illicite an d'Surveillance vum Commerce transfrontalier. Do mussen vill Minis- tèren zesummeschaffen: d'Santé, den Intérieur, d'Finanze mat der Douane, d'Justiz an esou weider.

Dann d'Interdiction de la vente aux mineurs - dat ass en élaboration krute mer scho gesot - oder och Reglementatiounen iwwert d'Publi- citéit an de Parrainage, wou mir jo déi nei Direktiv ofwaarden, déi am Moment nach blockéiert ass duerch d'Interventioun vun eisen däitschen Noperen, oder och d'Responsabilité pénale et civile, déi et am Detail ze definéiere géllt. Ech hunn elo mol nach net ge- schwat vun deem ganze Volet Éti- quetage an Information du public, Sensibilisation an esou weider an esou fort.

D'Zeeche stinn also - an da sinn ech scho bal um Schluss uge- laangt - eindeuteg an och onaus- weechlech op Ännerung vun der aktueller Législatioun, net zulescht och dofir dass dës Ratifikatioun haut um Ordre du jour steet. Et kënnt also zu enger Ausdehnung, enger obligatorescher Ausdeh- nung vun de Restrictione fir d'Pu- blicitéit an et kënnt och zu enger Ausdehnung vun der Interdiction de fumer dans certains lieux. Dat ass elo scho sécher.

Wann et nom Wonsch vum Statsrot geet, da ginn dës Bestëmmunge wäit a se bezéien sech net nëm- men op eng ganz Rëtsch vu Lieux publics...

■ **M. le Président**.- Madame Rapportrice, ech bieden lech elo zum Schluss ze kommen.

■ **Mme Lydia Mutsch** (LSAP), *rapporteuse*.- Jo.

..., mä och op Cafée beispillsweis. Mir sollten also net vergiessen, dass den Handlungssputt ganz grouss ass.

Ofschléissend eng perséinlech Ap- préciatioun.

Ech si fest dovunner iwwerzeegt, dass et op Grond vun dëser Convention-cadre an deene Geset- zer, déi nach drunhänken, weder zu engem Volleksopstand kënnt, wat d'Ëmsetzung ubelaangt, nach zu engem Polizeistat, wat d'Kontroll ubelaangt - well et ass net vill Po- lice an de Fligieren - oder och zu enger wierklecher Polariséierung vun zwou Gruppen, déi sech ei- gentlech géigeniwwerstinn. Dat war net esou an der Gesondheets-

kommissioun, an ech sinn dovunner iwwerzeegt, dass dat och net an dësem héijen Haus wäert esou sinn.

Op alle Fall géing ech am Numm vu menger Fraktioun den Accord fir dës Convention-cadre mat op de Wee ginn.

M. le Président. - Merci, Madame Rapportrice. Als éischt Riednerin ass d'Madame Martine Stein-Mergen ageschriwwen. Madame Stein, Dir hutt d'Wuert.

Discussion générale

Mme Martine Stein-Mergen (CSV). - Merci. Här President, Kolleginnen a Kollegen, am Numm vun der CSV-Fraktioun wëll ech fir d'éischt der Rapportrice villmools Merci soe fir hire gutt recherchéierte Rapport, deen alleguerten d'Facettë vun de Konsequenze vun der OMS-Kaderkonventioun beliicht. Ech wëll dofir just nach op e puer Aspekter agoen, déi ons wichteg schéngen.

D'Diskussioun an dësem Thema ass wéi all Diskussioun ëm Themaen, déi vill Leit direkt betreffen, an der Öffentlechkeet zimlech on-differenziéiert gefouert ginn. Och dovunner huet d'Rapportrice scho geschwat. Émmer erëm gouf jiddferengem seng Fräiheet ugefouert, fir ze fëmmen oder net. Or, d'Theorie, dass et jiddferengem selwer iwwerlooss ass ze fëmmen oder net, an dass jiddferengem seng perséinlech Fräiheet direkt betraff wier, ass an zwou Hypothese falsch.

Déi éischt Hypothees ass déi, dass nëmmen deen eng fräi Décisioun hält, wann en am volle Wësse vun alle Konsequenzen handelt. Déi zweet Hypothees ass déi, dass jiddferengem seng Fräiheet do ophält, wou deem anere seng ugeet.

Fir d'éischt zur éischter Hypothees. Eng wierklech fräi Décisioun kann also nëmmen deen huelen, wann een am Wësse vun alle Konsequenze steet. Or, dat ass bei deene meeschten Tubaksofhängegen net de Fall. Den Alter an deem Jugendlecher, jo Kanner, den éischte Kontakt mat der Zigarett hunn - mir hunn et jo elo grad héieren, 13 Joer an e puer Méint -, ass leider nach ëmmer amgaangen erofzegoen.

Elo ass et zwar e Fait, dass d'Kanner an der Schoul duerchaus iwwert d'Geforen am Zesummenhank mam Fëmmen informéiert ginn. Hei muss een och eng kéier ervirsträichen, dass zum Beispill d'Association contre le cancer bei deene Jonke mat hirer Smokebusters-Campagne ganz staark present ass. Mä wann een esou jonk ass, da weist een d'Konsequenzen, déi jo och eréischt vill méi spéit optrieden, ganz wäit vu sech.

Wat kraazt een - fir an hirem Slang ze bleiwen - 14-Jähregen, dass hie vläicht a 40 oder 50 Joer eng Gefässkrankheet oder Kriibs ka kréien? Den Image vun dëse Krankheeten ass dee vum héijen Alter, a Gott sei Dank si se dat jo och majoritär. De Marlboro-Cowboy ass zwar u Longekriibs gestuerwen, mä hie war jo och schonn al. Fir si ass et also wichteg, dass net nëmmen déi negativ Konsequenzen ugeschwat ginn, mä dass déi positiv Messagen, déi se aus der Publicitéit kréien, ënnerbonne ginn.

Vläicht mussen ons Informatiounscampagnen an de Schoulen och nach e bësse méi dissuasives ginn, e bësse méi realistesch nach, fir hinnen d'Loscht um Fëmmen ze huelen. Firwat sollten si net zum Beispill e Patient mat enger Folgekrankheet kenne léieren, ee mat enger Laryngectomie? Dat sinn déi Leit, déi kee Kehlkopf méi hunn. Oder een, deen de ganzen Dag un enger Sauerstoffbomm hänkt? Dat wier vläicht méi reell an ofschreckend. Ech sinn iwwerzeegt, dass sech och fräiwëlleg Patiente géife fannen, fir deen Exercice matzemaachen.

Et ass awer e Fait, dass de Mënsch sech virun esou Messagé schützt.

Säit et déi ellen Ziedelcher op den Zigarettépäck gëtt, gëtt et och Pochetten ze kafe fir d'Zigaretten dranzemaachen, dass een d'Ziedelcher net méi gesäit.

E weidere Message, deen een der Jugend muss nobréngen, ass dee vun der Sucht. Mir hunn am Zesummenhang vum Fënnefjoresplang zur Suchtpreventioun rezent doriwwer geschwat. Tubak oder all déi Stoffen, déi dem Tubak zougesat ginn, biergen en extrem héicht Suchtpotential. Jugendlecher sollte wëssen, ier se den éischte Pak Zigarett kafen, dass et eng Sucht ass, egal ob dat op Tubak, Alkohol oder illegal Drogen ass.

All Mënsch huet individuell eng aner Äntwert op dëst Suchtpotential vun deem Stoff. Déi eng si kloer méi a Gefor wéi aner. Och wat den Entzuch ubelaangt, sinn déi individuell Reaktiounen verschidden - deenen enge geléngt et opzehalen, deenen aneren net.

Mir sinn haut an der Medezin à même deem Patient, dee wëllt ophale mat fëmmen eng gewëssen Hëllef unzebidden. Dëse Mechanismus fonctionnéiert iwwert dat perséinlecht Bild, wat all Mënsch sech iwwer säi perséinleche Gesondheitszoustand a säi Liewenswandel mécht.

Wéi gëtt dëst Bild vermëttelt? Mir hu scho geschwat vu senger eegener Perséinlechkeet a sengem eegene Suchtpotential, et spillen awer och eng Rei äusserlech Facteure mat.

D'Meenung an de Modell vun der Famill, vun de Kollegen a Frënn, d'Rollemodeller an der Gesellschaft, den Afloss vun der Education an déi Wäerter, déi si vermëttelt, mä och déi öffentlech Meinung, wéi si sech zum Beispill dozou stellt op öffentleche Plazen ze fëmmen, beaflost deen Einzelnen. Aus all dësen Informatiounen rechent jidderee sech säi perséinleche Risiko aus a gëtt doduerch méi oder manner staark motivéiert säi Verhalen ze veränneren.

Ausléiser zu dëser Verhalensännerung sinn - mir nennen et an der Verhalensfuerschung „triggers of change“ - verschidde Momenter. Zum Beispill wann een aus dem Frëndeskrees krank gëtt, oder bei de Fraen ass et oft dann, wa si déi éischt Falen entdecken oder zum Beispill wann de Präis fir den Tubak spierbar an d'Luucht geet an ee vläicht muss op eppes aneres verzichten fir seng Zigarett ze kafen. Wann dëse Moment dann do ass, dann ass et un de Professionellen ze profitéieren an dem Patient bäizestoe bei sengem Entzuch.

An der Formation spécifique vun de Generaliste gëtt et säit den 90er Jore Modulë vun Tabacologie. Den Dokter léiert wéi e sengem Patient esou effikass wéi méiglech kann hëllefen. Hie muss déi richteg Argumenter hu wann hie mierkt, dass de Patient zeideg ass fir den Entzuch ze risquéieren. Och vu verschiddenen Associatiounen gi ganz vill Coursën ugebuede fir deenen Tubaksofhängegen ze hëllefen, mä ophale muss natierlech nach ëmmer jidderee selwer.

Ech wëllt nach eng kéier ganz kuerz op den Afloss vum Tubakspräis op d'Fëmmverhale vun deene Jonken agoen. Den Haut Comité d'experts cancérologues, huet a sengen Helsinki-Recommandatiounen schonn 1996 gesot: «Il est prouvé que les augmentations de prix dissuadent de fumer, surtout en ce qui concerne les enfants. Pour que cet effet soit maintenu, les prix doivent être augmentés régulièrement.»

D'Spezialiste rodén zu enger europäescher Harmoniséierung vun der Steierpolitik a Richtung op en héije Verkafspräis. Doriwwer eraus proposéiere si awer och eng Limitatioun vun der Vente u Jugendlecher a si géint de Self-service an Automate fir Tubaksprodukter. Dës sënnvoll Mesure gëtt vun der Konventioun préconiséiert a mir wäerten se da sécher och deemnächst

an engem Gesetzesprojet erëmfannen - d'Rapportrice huet schonn dovunner geschwat.

Ech mengen, mir hate mat dësen Ausféierunge gewisen, dass de Begrëff vun der fräier Décisioun unzefänken ze fëmmen, staark muss relativéiert ginn. D'CSV-Fraktioun ass iwwerzeegt, dass eng ganz Rei gesetzlech a reglementär Mesuren amstand si ville Jonken ze hëllefen net unzefänken.

Ech wëll do nach kuerz iwwert déi zweet Hypothees schwätzen an där d'Kritiker vun der Convention-cadre Onrecht hunn. Wou deem Nächste seng Fräiheet ugeet, hält engem seng eege Fräiheet op. D'Philosophie ass et eben net deem Eenzelne seng Fräiheet anzeschränken, mä d'Recht vun deene Leit, déi net fëmmen, ze garantéieren. Si sollen den Nuisancë vum Passivraachen net ausgesat ginn. Dass dat schiedlech ass, ass eendeiteg, an dat huet schliesslech dozou gefouert, dass d'Populatioun, déi net fëmmt, no Moossname freet, fir vum Législateur dergéint geschützt ze ginn. Et ass ze diskutéieren, awéiwäit mer do dem Beispill vun Irland an Italien noginn d'Fëmmen op öffentleche Plazen ze verbidden.

Mä ech stelle mer awer nach eng aner Fro: Wéi ass et bei de Leit doheem? Wann een dovunner ausgeet, dass een no enger Stonn an engem Bistro duerch Passivfëmme geschiedegt ginn ass, wéi ass et da mat schwangere Fraen, déi fëmmen? Wéi ass et mat de Kanner an engem Stot, wou andauernd den Damp an der Loft hänkt? En Embryo kritt bei engem Strapp Zigarett vun der Mamm Häerzklappen, dat ass bewisen. Kanner aus engem Stot, wou gefëmmt gëtt, hunn erwisenermoosse méi oft Asthma. Och hei gëllt et unzegräifen an d'Argument vun der Gesondheet vun de Kanner ríft no enger Iwwerleeung, awéiwäit een duerch Campagnë méi speziell kann Elteren oder zukünftég Eltere sensibiliséieren.

Här President, Dir Dammen an Dir Hären, de Gesondheitsminister Johnny Lahure huet am Joer 1994 e Wäissbuch iwwert d'Gesondheet zu Lëtzebuerg erausginn. Dëst Buch war en interessante Bäitrag d'Couranten an allen Domäne vun der Santé eemol festzehalen an op dëser Basis Ugrëffspunkter ze definéieren a Strategien ze entwéckelen. Ech sinn iwwregens iwwerzeegt, dass net nëmmen d'Gesondheitsberuffer, mä och d'Politiker sech géifen iwwer eng nei Oplag vun dësem nätzlechen Instrument freeën.

Firwat ech awer dovunner schwätzen, dat ass, well d'Buch eng flott Statistik enthält iwwert d'„années de vie perdues“. Dat sinn déi Jore bis 65 Joer, déi déi Leit net erliewen, déi fréizäiteg stierwen. Am Ganze waren dat zum Beispill 1990 13.675 Joer bei 941 Doudesfäll. Et ass ënnersicht ginn, wat d'Ursaache fir dës „années de vie perdues“ waren an hei schléit de Kriibs mat 22,8% zu Buch, d'Gefässkrankheete mat 13,8% an d'Otemweeskrankheete mat 2,7%. Dat maachen zesummen 39,3% vu Krankheeten, déi zu engem groussen Deel dem Fëmmen zouzerechnen sinn. Dës Zuele sollen eis dann encouragéieren d'Anti-Tubak-Konventioun vun der OMS sou séier wéi méiglech ze ratifizéieren.

An am Intérêt vun der Santé publique géif ech lech heimadder och den Accord vun der CSV-Fraktioun zu dësem Projet de loi bréngen. Ech soen lech Merci.

Plusieurs voix. - Très bien.

M. le Président. - Merci, Madame Stein. Als nächste Riedner ass den Här Niki Bettendorf agedroen. Här Bettendorf, Dir hutt d'Wuert.

M. Niki Bettendorf (DP). - Här President, Dir Dammen an Dir Hären, haut geet et am Prinzip ëm d'Unhuele vun der OMS-Konvention fir de Kampf géint den Tubak. Domat hu mir als Demokratesch Partei guer kee Problem, well si ass vu Lëtzebuerg de 16. Juni 2003 ënnerschríww ginn an dat ënnert engem DP-Gesondheitsminister, dee Carlo Wagner geheescht huet, an enger Ausseministerin, déi d'Lydie Polfer war.

Mir hunn der Rapportrice, der Madame Lydia Mutsch, hire Rapport an der Santéskommissioun eestëmmeg guttgeheescht an ech soen der Rapportrice och Merci fir hiren exzellente Rapport.

Eis Diskussioun vun haut dréint sech awer genaousou vill ëm dem neie Gesondheitsminister säin ugekënnegt neit Gesetz. Ech gesinn dofir eisen Débat vun haut och e bëssen als en Débat d'orientation un ebe fir da kommend Gesetz - dat am Géigesaz zu der Madame Rapportrice.

Jiddereen, ob e fëmmt oder net fëmmt, weess hautdësdags, dat den Tubak der Gesondheet schuet. Een dee fëmmt ass sech bewosst, dat hie senger Gesondheet keen Dëngscht erweist. Et kann haut kee méi kommen a behaapten hien hätt net en connaissance de cause gefëmmt. D'Risikoen an d'Gefore si säit längerem bekannt an d'Sensibilisierungscampagnë lafe scho säit Joren a gi mat der Zäit ëmmer méi schlagkräfteg. Sou sollen an der Zukunft net nëmmen Texter op den Zigarettépäck ze liese si wou op d'Geforen higewise gëtt, mä et sollen och ofschreckend Fotoen op d'Päck derbäikommen - d'Madame Stein huet eis elo grad erkläert, dass et haut awer och scho Pochettë gëtt, wou een déi Päck dann erëm kënnt doranner verstoppen.

Déi bescht Method fir perséinlech dem Tubakproblem, dat heescht der Tubaksofhängegkeet aus dem Wee ze goen, ass déi, fir iwwerhaupt net mat Fëmmen unzefänken. Et gëtt der och déi schonns bei der éischte kéier därmoossen den Dégoût an d'Fëmme kréien, dat si duerno hiert Liewe laang keng Zigarett méi upaken. Dat ass awer nach laang net ëmmer de Fall an eng héich Unzuel vu Leit kommen net méi oder ganz schwéier vum Tubak lass.

Dorausser ergi sech folgend Erkenntnisser:

- Haauptsächlech muss eis Jugend sensibiliséiert an informéiert ginn; an dat huet bis haut net richtig geklappt. Déi meescht Fëmmerte fänken am ganz jonken Alter mam Tubakkonsum un. Am Rapport steet, dat d'Unzuel vun deene méi jonke Fëmmerten och nach haut ëmmer zouhëlt. Mir mussen also weider Effortë maache fir ze verhënneren, dass eis jonk Matbierger an d'Tentatioun komme fir iwwerhaupt unzefänken ze fëmmen.

- Déi, déi schonns ugefaangen hunn, mussen mer dovunner iwwerzeegt kréien, sou fréi wéi méiglech opzehalen; wat éischter wat besser. An deem Kontext ass och e Verkafsverbuert u Jugendlecher ënner 16 Joer ze begrëissen.

- Déi Tubaksofhängeg mussen och an hiren Efforten, fir hirer Sucht lasszeginn, ënnerstëtzt ginn.

De Rapport seet eis, dat ronn 50% vun deenen déi fëmme wëllen ophalen, woubäi 33% näischt an deem Sënn wëllen ënnerhuelen. Ech kéint mer virstellen, dat ënnert deenen 33% eng Majoritéit vu Jonke sinn, déi d'Fëmmen nach net als problematesch emfannen. D'Demokratesch Partei ass der Meinung, dass d'Substitutionsmëttel wéi d'Nikotinspatché sollte vun der Krankeess rembourséiert ginn.

Wat mir besonnesch opfällt ass, dat ëmmer méi jonk Meedercher ufänken ze fëmmen, duerch d'Groussgaass treppelen an den Damp esou richtig déif an d'Longeranzéien. Wéi nennt een dat? Égalité des chances.

Misst een net dëse jonke Meedercher kloermaachen, wat dat fir hir spéider Kanner mat sech bréngen kann? An et wier vläicht och gutt wann och Fraenorganisatiounen sech géifen hei vehement zu Wuert mellen.

Här President, erlaabt mer hei awer och, virun enger Stigmatiséierung vun de Fëmmerten an eiser Gesellschaft ze warnen. Domadder léist ee kee Problem. Et ginn der héchstens neier geschafen. Beim Cannabiskonsum zum Beispill gëtt et esouguer Politiker hei am Haus, déi dat banaliséieren. An dëselwecht verdäiwelen den Tubak. Fir mech bleift eng Drog eng Drog an...

M. François Bausch (DÉI GRÉNG). - Wien ass dat?

M. Niki Bettendorf (DP). - Oh, et sinn der souguer vun Ärer Facultéit, et waren der ganz staark dobannen.

(Interruption)

Jo.

(Coups de cloche de la Présidence)

M. François Bausch (DÉI GRÉNG). - Ech géif den Här Bettendorf bieden opzehalen ze polemiséiere mat esou engem eeschte Sujet wéi deem doten an enger Fraktioun heibannen ze ënnerstellen, wann et ëm Droge géing goen, hei géing eng Fraktioun oder een hei am Parlament d'Drogeproblematik banaliséieren.

(Interruption)

Här Bettendorf, schwätzt hei zum Sujet wann ech gelíft a schwätzt hei net iwwer aner Saachen.

(Brouhaha général et interruptions diverses)

(Coups de cloche de la Présidence)

M. le Président. - Här Bausch, loosst elo den Här...

M. Carlo Wagner (DP). - Den Här Bettendorf huet zum Cannabis geschwat an net zu den Drogen am Allgemengen, an duerfir fannen ech déi Interventioun do super déplacéiert, Här Bausch!

(Coups de cloche de la Présidence)

M. Niki Bettendorf (DP). - Här President, ech muss lech soen, ech sinn net gewinnt als Politiker ze léien, mä ech kennen anerer, déi dat regelméisseg maachen.

(Interruptions)

M. le Président. - Berouegt lech elo all an den Här Bettendorf fiert weider.

M. Niki Bettendorf (DP). - Et brauch een och net ze pausaliséieren. Et ginn déi sou genannte Ketteraucher. Anerer fëmmen nëmme geleeëntlech. Déi eng fëmme well se d'Gefill hunn, ouni Tubak géif et net méi goen. Anerer fëmmen heiansdo, well se dat als e klenge Plëséier emfannen.

Ech mengen d'Kaderkonventioun vun der Weltgesondheitsorganisatioun, déi mer haut ëmsetzen, huet och net d'Verdäiwelung vun de Fëmmerten am Sënn. Hei gëtt villméi de politesche Wëllen ausgedréckt, fir progressiv den Tubakkonsum weltwäit ze reduzéieren.

Ech brauch hei net op all Einzelheete vun der Kaderkonventioun anzegoen, well déi sinn aus dem Rapport vun der Madame Lydia Mutsch kloer ervirgaangen.

Ech wëll awer och déi Beschëllungen, déi eise Gesondheitsminister, den Här Mars Di Bartolomeo, hei virun e puer Wochen der DP an dësem Dossier gemaach huet, zrëckweisen. Mir brauchen eis hannert kenger Tubakslobby ze verstoppén. D'DP steet voll a ganz hannert dëser OMS-Konventioun a wäert déi och haut stëmmen.

Mir warnen awer virun engem Sträit Fëmmert/net Fëmmert. D'Kaderkonventioun gesäit vir, datt déi verschidde Signatairë méi wäit kënnen goe wéi et vun der OMS festgehalen gouf.

D'Demokratesch Partei ass der Meenung, datt och hei de Proportionalitéitsprinzip sollt ugewannt ginn: Méi wäit Jo; ze wäit Neen. Den Artikel 6 énoncéiert finanziell a steierlech Mesuren - ech komme vläicht nach drop zrëck, Här Minister -, déi an deenen eenzelne Länner kënnen geholl ginn. Am Kloeertext heescht dat, datt en Eropsetze vum Tubakspräis an d'Ae kéint gefaasst ginn, fir d'Demande ze drosselen.

Effektiv kënnen héich Präisser ofschreckend op potentiell Fëmmerte wierken. Déi, déi schonns ofhängeg sinn, wäerten awer wuel kaum vun esou Mesurë profitéieren. Dës lescht huet e franséische Student um Radio gesot, vu datt de Pak Zigaretten elo esou deier wier, géif hien elo keng méi kafen. Hie géif elo nëmmen nach Zigaretten heesche goen.

Ech wëll niewebäi nach bemierken, dass d'Accisen op den Zigaretten dem Lëtzebuerger Stat ronn 25 Milliounen Euro am Joer 2002 abruucht hunn. 2003 sollen et der 33 Milliounen gewiescht sinn a fir 2004 waren et der 57 Milliounen. Hei kann eng ähnlech Diskussioun wéi déi vum Tanktourismus gefouert ginn.

Wann de Lëtzebuerger Stat esou vill méi Accisen erakriit, dann ass dat net, well mir Weltmeeschter am Fëmmen sinn, mä well mat eise Präisser d'Camione vun Tubak an Zigaretten iwwert d'Grenze ginn. Ech krut dëslescht eng Invitatioun fir e Fousstour an den Hautes Fagnes. De Präis vum Mëttegiesse war net an Euroen uginn, mä et konnt ee säi Mëttegiesse mat enger Staang Boule-d'Or-Filter bezuelen, och mat Lëtzebuerger Steierbännercher. Ech weess, hei kënnt op eis politesch Responsabel nach ganz vill Aarbecht duer.

Här President, ech kommen elo zum Schutz virum Tubaksdamp op der Aarbechtsplaz oder an öffentleche Gebaier. Wat de leschte Punkt ubetrëfft, dee vun de Lieux publics intérieurs, esou besteet e Fëmmverbuet schonns säit 1989. Allerdéngs gëtt dat Fëmmverbuet net iwwerall agehalen. Esou zum Beispill hei an der Chamber, oder ass ons Chamber keen öffentlecht Gebai?

(Interruption)

Wa mer also en neit Gesetz kréien, da muss et eent si wat Kapp a Fouss huet. Jo, mir hunn och ënnert ons Tubaksdrogéierter, an ech géif déi net virun d'Trap oder virun de Palais oder hei virun d'Chamber fëmmen schécken, mä ech géif an der Chamber e Raum schafe wou ka gefëmmt ginn.

Da kommen ech zu de Lieux de travail intérieurs. D'Gesetz vum 6. Januar 1995, wat dat vun 1989 ëmgewandelt huet, mécht eng Opleschtung vun deene Plazen, wou et verbueden ass ze fëmmen. Op dëser Lëscht sinn d'Restauranten an d'Caféen net drop. Elo kënnt ëmmer méi d'Meenung op, de Statsrot seet dat och, do misst och elo Fëmmverbuet gëllen.

D'Demokratesch Partei ënnerstëtzt all Mesuren, déi zu engem bessere Schutz virum Tubaksdamp bäidroen, wéi et d'Kaderkonventioun jo och virgesäit. E bessere Schutz heescht awer net onbedéngt, datt iwwerhaupt net därëf gefëmmt ginn oder keen Zigaretteendamp méi därëf toleréiert ginn. Et gëtt och nach manner radikal Léisunge wéi déi, déi de Gesondheitsminister schonns ugekënnegt huet. Vun engem totale Fëmmverbuet an de Restauranten war ufanks Rieds, wéi et schonns an Irland an an Norwegen applizéiert gëtt. Am Mäerz dunn huet et an enger Äntwert op eng parlamentaresch Ufro vum Claude Meisch geheescht: «des espaces fumeurs bien séparés

pourraient être aménagés sous des conditions à définir».

Ech erënneren hei gären drun, datt d'Fëmmverbuet, conformément zum Gesetz vum 6. Januar 1995, net operluecht ka ginn „dans les fumoirs spécialement aménagés à cette fin par l'exploitant des lieux”.

D'Demokratesch Partei ass kloer géint en totalen a radikalen an direkte Fëmmverbuet an de Caféen a Restauranten. Et handelt sech hei net ëm öffentlech Raimlechkeete wéi eng Post oder eng Gare. Et handelt sech och net ëm e Büro. Et handelt sech ëm e Lieu de rencontre, wou een net muss higoe wann een net wëllt, ausser awer d'Personal wat do schafft. Ech weess wat Passivfëmmen bedeit, wor ech dach 25 Joer laang vun null bis 25 Joer an enger Wertschaft, wou et ëmmer schwaarz vun Dampf war, a meng Mamm huet no 45 Joer Wiertsfra fënnef Joer gebraucht, bis si erëm clean war.

D'DP wäert sech och an der Zukunft dofir asetzen, fir datt d'Recht vun den net Fëmmerten op propper Loft besser zur Geltung kënnt. Mir sinn nach wie vor der Meenung, an do hu mer eis Meenung vu virun de Wahlen net geännert, och wann hei probéiert ginn ass virun e puer Wochen dat op eng polemesch Aart a Weis ze demonstrieren. De Gesondheitsminister huet hei e Saz aus engem klengen Text virgelies, dee scheinbar aus enger DP-Enquête ervirgaange wier. Dobäi huet et sech ëm eng Äntwert op eng Fro vun enger Privatpersoun iwwer Email gehandelt.

Mir hu gesot, Här Minister: „Unter DP-Gesundheitsminister Carlo Wagner wird im Rahmen der Gesundheitserziehung der Tabakkonsumbekämpfung eine große Bedeutung angemessen. Erinnern wir an die verschiedenen Anti-Tabak-Kampagnen, die vom Gesundheitsministerium gestartet wurden.

Allgemein sind wir ebenfalls der Meinung, dass das Recht der Nichtraucher auf saubere Luft besser geschützt werden soll. Besonders an öffentlichen Stellen muss das Rauchverbot gemäß dem Gesetz aus dem Jahre 1989 strenger angewendet werden. Restaurants sind eigentlich nicht mit öffentlichen Stellen („lieux publics“) gleichzustellen. In Restaurants oder am Arbeitsplatz sollten systematisch zum Schutz der Nichtraucher rauchfreie Zonen die Regel darstellen, die abgegrenzt von Rauchzonen sein sollen.

Rauchfreie Zonen dürfen nicht einfach nur als eine Ausnahme oder Luxus gelten; es sollen keine rauchfreien Inseln im Sinne einer Begünstigung (sprich Extrawurst) für Nichtraucher eingerichtet werden, sondern die Raucherzonen müssten zur Ausnahme werden. Es gilt allerdings eine friedliche Koexistenz zwischen Rauchern und Nichtrauchern anzustreben. Eine Politik zum Schutz der Nichtraucher darf nicht zu einer Hexenjagd gegen Raucher ausarten, auch darf das Rauchen nicht wie teilweise in den USA kriminalisiert werden.”

Dat hu mir viru ronn zwee Joer gesot, an déi Meenung vertriède mir nach haut. D'Schafe vu méi fëmmfräien Zonen ass ze encouragéieren, wa méiglech getrennt mat enger adequater Entlüftung fir Fëmmzonen, sou datt och d'Personal méiglechst propper Loft kann anootmen.

Mir leeën awer weiderhi Wäert op eng friddlech Koexistenz zwëschen Tubakskonsumenten an net Tubakskonsumente nom Motto: „Meng Fräiheet hält do op, wou deem anere seng ugeet.” Dat gëtt elo hei fir d'drëtt gesot.

Wann ech dëse Saz aus eise liberale Manifest vu viru méi wéi 12, 13, 14 Joer zitéieren, dann ass dat well ech mengen Oueren net konnt gleewen, wéi den Här Mars Di Bartolomeo dësen Text op der Televisioun auswendeg virgedroen huet a fir sech an Usproch geholl huet.

Ech hätt net gemengt, dass hien op esou excellent DP-Literatur géif zrëckgräife fir de Leit seng Politik ze explizéieren.

■ Une voix. - Très bien!

■ **M. Mars Di Bartolomeo, Ministre de la Santé et de la Sécurité sociale.** - Dir hutt de Message vun de leschte Wahlen nach net verstan. Mä ech wäert lech en awer an Erënnerung rufen, de Message vun deene leschte Wahlen.

■ **M. Niki Bettendorf (DP).** - Här President, ech weess, Dir sidd mat mir eens, zu enger Hexejuegd därëf et net kommen.

D'DP kritiséiert och weiderhin, datt elo per Gesetz vun uewen erfoll ee Verbuet imposéiert ginn. Firwat net méi Vertrauen an d'Horesca hunn? Firwat net dem Beispill vun Holland, Éisträich oder Däitschland folgen an op de Wee vun engem Accord goen? Wat Rout/Gréng an Däitschland fäerdeg bréngt misst dach och am klengen Lëtzebuerg méiglech sinn.

Misst hei net nom Prinzip vun der Subsidiaritéit gehandelt ginn, an der Horesca d'Chance gi ginn déi Saach an de Grëff ze kréien? Am Rapport steet 70% vun den Employeuren am Horeca-Secteur wäer géint ee Fëmmverbuet. D'Horesca selwer seet an hirer Publikatioun vum Mäerz, et wieren 80%, déi dogéint wäeren.

Déi concernéiert Leit fäerte ganz einfach, datt si een net négligeablen Deel vun hirer Clientèle verléieren. Si sinn awer bereet Efforten ze maachen, fir datt déi Leit, déi net fëmmen - an dat ass statistesch gesi jo ëmmerhin d'Majoritéit -, besser geschützt ginn.

Här President, erlaabt mir nach eng Kéier op deen Accord zrëckzekommen, deen den 1. Mäerz 2005 zwëschent der Dehoga (deutscher Hotel- und Gaststättenverband) an dem Bundesministerium für Gesundheit und Soziale Sicherung zustane komm ass.

Heivu concernéiert sinn all Betriber an Däitschland, déi regelméisseg lessen zerwéieren an iwwer 75 m² respektiv 40 Sëtzelplazen hunn. Bis zum 1. Mäerz 2006 solle mindestens 30% vun deene Restaurateuren 30% vun hire Raimlechkeete fir net Fëmmerte reservéieren. Dat Joer dorop sollen et 60% vun de Restaurateuren sinn, a 40% vun de Raimlechkeeten, a bis zum 1. Mäerz 2008 solle mindestens 90% vun de Restauranten ee Minimum vu 50% vun hire Raimlechkeeten den net Fëmmerte reservéieren. Dozou gehéiert natierlech eng adequat Kennzeichnung.

Ech wëll dat Dokument vun der Dehoga hei an der Chamber deponéieren, fir dass et och deenen aneren Deputéierte kann zougestallt ginn. D'Demokratesch Partei fuerdert de Gesondheitsminister op, dach och op de Wee vun esou engem Accord ze goen amplaz vun enger gesetzlecher Zwangsjackett.

Ass esou ee Gesetz net dach awer een Agrëff an déi individuell Fräiheet vun Eenzelnen? Wie soll dann d'Anhale vun esou engem Gesetz kontrolléieren, d'Police oder den Agent municipal? Dat ass e ganz wichtege, e springende Punkt. Wie verbaliséiert? Wie gëtt verbaliséiert? De Client? De Wiert? Ech weess et net! Ech mengen, mat Knëppele fänkt ee keng Vullen. Mir sollen eis nom däitsche Muster een Zäitraum ginn an deem mir den Idealfall wëlle realiséieren.

Näischt verhënnert ee Restaurateur a senger Entrée ze affichéieren, dass bei him am Restaurant net gefëmmt gëtt. Dat gëtt et schonns op verschiddene Plazen hei zu Lëtzebuerg.

Zu der Konventioun, déi mir mat eise Gesetz vun haut an d'Lëtzebuerger Recht ëmsetzen, wëll ech awer nach kuerz rappeléieren, zu wat mir eis mat der Ënnerschrëft vun der Konventioun engagéiert hunn. Do si véier Punkten: „l'obligation d'information”, ee staarke politeschen Engagement, international Kooperatioun, a véiertens - an do läit wierklech de grouse Problem - „la reconnaissance de l'importance d'une assistance technique et financière pour faciliter la reconversion économique des cultivateurs de tabac ainsi que des travailleurs dont les moyens de subsistance sont gravement compromis par l'application des programmes de lutte antitabac”.

Honorabel Deputéierten, dat ass net d'Tubakslobby, mä dat sinn aarm Leit!

(Interruption)

A meng Zäit ass ofgela.

Europa huet an der Zäit 80 Milliounen Euro an de Maroc investéiert, fir dass do d'Cannabisplantagë sollte verbrannt ginn. D'Marokkaner hunn dat gemaach. Mir Europäer hunn deenen hir aner Wueren awer net ofkaf. Wat hunn d'Bauere gemaach? Si hunn erëm neie Cannabis ugeplant. Marokko läit 14 km vun der spuenescher Grenz ewech, an haut hu mir de Cannabis erëm massiv an Europa dran.

Dir Dammen an Dir Hären, ech soen lech Merci fir d'Nolauschten. Op alle Fall mir als Demokratesch Partei wäerten dëst Gesetz stëmmen.

■ Une voix. - Très bien!

■ **M. le Président.** - Merci, Här Bettendorf. Als nächste Riedner hu mir den honorabelen Här Huss. Här Huss, Dir hutt d'Wuert.

■ **M. Jean Huss (DÉI GRÉNG).** - Villmools Merci, Här President, fir d'Wuert. Dir Dammen an Dir Hären, et ass kloer, dass déi Gréng dëse Projet de loi iwwert d'Ëmsetzung vun der OMS-Kaderkonventioun am Kampf géint den Tubak wäerte stëmmen.

Wann d'Gesondheetsschied an d'Doudesfäll duerch Tubak an Nikotin net esou gravéierend wieren, wier et bal esouguer scho langweilg hei nach eng Kéier doriwwer schwätzen ze missen. Mä nach gëtt et ze vill Leit, déi vun hiren Zigaretten ofhängeg sinn an net dovunner lasskommen, an nach gëtt et ze vill Fëmmerten, déi net nëmmen déi eege Gesondheet op eng schläichend Aart a Weis op d'Spill setzen, mä déi doduerjer an Innenraimlechkeeten och d'Gesondheet vun hire Matmënschen a vun hire Kanner op d'Spill setzen.

Wann an der Ëmweltmedezin vun enger sou genannter Pollution de l'habitat geschwat gëtt, da gehéiert do op jidde Fall och d'Fëmmen zu enger vun deene problemateschste Belaaschtungen. Beim Fëmmen ënnerscheet een tëschent dem Hauptstrom vum Zigaretteendamp, deen de Fëmmert direkt anotemt, an dem sou genannte Niewestrom, oder dem Schwielbrand, deen da jiddereen an engem geschlossene Raum matanotemt, ob e wëllt oder net.

Grad dësen Niewestrom vum Zigaretteendamp oder dat passivt Matfëmmen ass no alle virleiede wëssenschaftlechen Donnéeën héich gesondheitsgefährlech. Vun all deene ville chemesche Molekülen, déi doranner enthalen sinn, gëllen der schätzungsweis 800 als Kriibs erreegend. Den Taux oder d'Konzentratioun vu verschiddene vun dëse Substanzen ass esouguer am Niewestrom munchmol méi héich wéi am Dampf selwer, deen de Fëmmert anotemt.

Beim Formaldehyd zum Beispill ass d'Konzentratioun am Niewestrom bis zu 50-mol méi héich, den Anilin 30-mol méi héich, den Nickelgehalt ass 31-mol méi héich, Kadmium siwemol méi héich, d'Ni-

trosamine 440-mol méi héich am Niewestrom wéi dat am Dampf ass, deen de Fëmmert selwer anotemt. Beim Benzpyren, deen noweisbar Kriibs erreegend ass, héich Kriibs erreegend ass, ass d'Konzentratioun véiermol esou héich am Niewestrom wéi am Hauptstrom, deen de Fëmmert selwer anotemt.

Passiv matfëmmen ze mussen ass also kee Kavaléiersdelikt, mä eigentlech ee Problem vu Kierperverletzung an ee grouse Problem vun der öffentlecher Gesondheet.

Firwat, Dir Dammen an Dir Hären, dës Zuelen? Firwat dës Opzielungen? Ganz einfach, well anscheinend nach ville Leit, déi ongenéiert an zouene Raim oder Buroe fëmmen, net bewosst ze si schéngt, wéi staark si net nëmmen hir eege Gesondheet, mä och déi vun deenen anere Leit an de Raim op d'Spill setzen - vu Bëbeeën a Kanner mol iwwerhaupt net ze schwätzen.

Wann een och weess, wéi vill Krankheeten duerch dee Gëftmix am Zigaretteendamp provoziert ginn, an dat sinn der ganz vill, da kann ee sech nëmme wonneren, wéi vill Leit, och intelligent Leit, trotzdem nach fëmmen. Typesch Folge vum Zigaretteendamp sinn Allergien, Otemweeërkrankungen, Asthma, Mëtellohrentzündungen bei Kanner an Zëmmeren, wou gefëmmt gëtt, Arterioskleros, Häerzinfarkt, Hireschlag, Osteoporos, a munche Fäll Beenamputatioun, a scho wéi gesot Bronchialkriibs, Kehlkopfkriibs, Longekriibs an esou virun.

Et ass dofir och kloer a richtig, datt d'Weltgesundheitsorganisatioun Kampagne géint den Tubakkonsum lancéiert, an hei eben dës Kaderkonventioun, déi et soll erméigleche konkret Moossname géint den Tubakkonsum ze ergräifen.

Als Gréng wäerte mer all positiv Moossname vun de Majoritéitsparteien op dësem Gebitt ënnerstëtzen, ob et sech ëm preventiv oder ëm kurativ Moossnamen handelt. Mä, et ass fir eis awer essentiell, datt wann nei Gesetzgeber oder Reglementer gemaach ginn, datt dann awer och muss dofir gesuert ginn, datt dat dann awer och iwwerwaacht a kontrolléiert gëtt.

(Coups de cloche de la Présidence)

Mir hate jo schonns e Gesetz vun 1989, dat d'Fëmmen an enger Rei vu Banneraim verbueden hat, well praktesch awer guer keng Kontrolle gemaach goufen, ass d'Fëmmen a Büroen oder op Aarbechtsplazen an och hei an der Chamber einfach monter virugaangen.

Als Gréng ënnerstëtze mer d'Initiativ vum Gesondheitsminister, fir a Restauranten zu engem Fëmmverbuet ze kommen. Et wier an eisen Aen awer méi einfach a méi sënnavoll d'Fëmmen insgesamt an allen öffentleche Raim ze verbidden, well d'Problematik vum Passivfëmmen ass déiselwech, ob et sech ëm Büroen, Schoulen, Spideeler, Restauranten, Caféen oder ëm öffentlech Raim handelt.

Mir ënnerstëtze selbstverständlech och all Moossname géint d'Publizitéit fir den Tubak oder géint de Sponsoring vu Manifestatiounen duerch d'Tubaksindustrie, wa se vum Ministère a vun dëser Regierung wäerte virgeschloe ginn. Sou wéi mer virun allem am Intérêt vun der Gesondheet vun de Jonken der Meenung sinn, datt d'Zigarette misste méi deier ginn, fir hei à la source ze handelen an nei Fëmmerten ënnert de Jugendlechen, ënnert den 12-, 13- a 14-Jährege vum Astieg an d'Nikotinsucht ofzehalen.

Eng regelméisseg a progressiv Erhéijung vun den Tubakspräisser, déi dach am interregionalen an am internationalen Vergläich hei zu Lëtzebuerg absolut niddereg am Moment leien - dofir hu mer jo dee ganzen Tubaktourismus -, wier a

mengen Aen op jidde Fall gerechtfaerdergt; wann ee bedenkt, wéi vill käschtenintensiv Krankheeten duerch den Zigarettekonsum geschaaft ginn, Krankheeten, déi eis Krankekeese belaauchten, a wann een och weess, wéi vill Steiersuen de Stat all Joer bäisteiert, fir de Budget vun dëse Krankekeesen eenegermoosse kënnen an der Riicht ze halen.

Dir Dammen an Dir Hären, an der Diskussioun nom Gesondheitsminister sengen Ukënnegungen ass vu munchen, net vun allen Nikotinofhängegen, an Zeitungsartikele gemengt ginn, elo géif op eng Kéier op eng diktatoresch Aart a Weis an hir perséinlech Fräiheet agegraff ginn. Dat ass an eisen Aen natierlech Kabes. Si behalen natierlech d'Recht op d'Fëmmen, dat, wat si hir Fräiheet nennen, mä sou wéi dat och op aner Gebidder de Fall ass, wou et Rechter gëtt, mä och Aschränkungen, sou soll et och hei sinn.

Et ass erlaabt an et gëtt d'Fräiheet mam Auto ze fueren, et ass awer net erlaabt mam Auto mat 100 duerch eng Uertschaft ze fueren, dat ass da gesetzlech geregelt. Wat op deem Gebitt richtig ass, dat muss och hei gëllen. An eisen Ae gëtt d'Fëmmen, d'Fräiheet fir ze fëmmen, fir kee Fëmmert ageschränkt, hie ka roueg virufëmmen, hien däerf och roueg seng Gesondheet ruinéieren, wann en dat wëllt maachen, mä et kann net sinn, dass hien duerch säi Fëmmen an engem geschlossene Raum aner Leit zwéngt passiv mat ze fëmmen, an doduerjer eventuell och krank ze ginn an doduerch eventuell och esouguer Longekriibs a sou virun ze entwéckelen; dat kann net sinn.

Dës international Conventioncadre ass an eisen Aen also absolut begrëssenswäert a mir hoffen, dass elo dann awer och relativ schnell déi noutwenneg reglementaresch oder gesetzlech Projeten nokommen a Saache Verbuet an Innenraim, a Saache vu Sponsoring a Publizitéit oder a Saache vu Fiscalitéit. A mir drängen drop, dass dës Reglementer dann awer och kontrolléiert an agehale ginn.

(M. Jos Scheuer prend la Présidence)

Nach zwee Punkte kuerz zum Schluss.

Deen éischten, wat den europäesche Kontext ubetrëfft, wou et an eisen Aen, Här Minister, endlech zu engem drasteschen Iwwerdenke vun der Subventionéierung vun den Tubaksbauern an Europa misst kommen...

■ **Une voix.** - Très bien.

■ **M. Jean Huss (DÉI GRÉNG).** - ..., well et kann een net gläwiedeg engersäits hei héich Subventionne weiderhin deene Leit ginn an anerersäits aus Gesondheitsgrënn de Konsum vun dëse Produkter bekämpfen.

An eng zweet Saach ass, déi eis awer och ganz wichteg schéngt bei alle Mesuren am Kampf géint den Tubak...

(Interruption)

Et muss een hinnen da Reconversionmesuren ubidden, dat ass ganz kloer, Här Mehlen, ech si ganz mat Iech averstanen.

..., wann engersäits streng Mesurë géint d'Passivfëmmen an Innenraim ergraff ginn, wat mir ënnerstëtzen, sou menge mir awer och, dass genuch a ganz vill Mëttele missten agesat ginn, fir de Fëmmerten, déi bereet sinn opzehalen, ze hëllefe vun hirer Nikotinofhängegkeet ewechzekommen. Dat misst an eisen Aen esouguer ee vun den Haaptpunkte vun allen Antitubakskampagne sinn, niewent der Suerg fir iwwer cibléiert Preventionmesuren, grad och Jonker, Jongen a jonk Meedercher, dovun ofzehalen, iwwerhaupt zur Zigarette ze gräfen.

An en allerleschte Punkt, fir dass ech dat elo hei net vergiessen: Wa mer als Chamber - hoffentlech unanime - dës Kaderkonvention gëint den Tubak wäerte stëmmen, da misst et jo dach awer och evident sinn, dass mer hei bei eis an der Chamber selwer gläich missten ufänken. Hei am Sall ass d'Fëmmen jo verbueden, mä dëst Fëmmverbuet misst sech op all Raim an all Büro bezéien, wou e Fëmmert net alleng an engem Raum schafft.

Här President, loosst eis grad hei mat engem gudden Beispill virausgoen an dës Konvention gläich selwer fir eis eege Raimlechkeeten...

■ **Une voix.** - Den Här Scheuer huet opgehale!

■ **M. le Président.** - Dierf ech Iech ënnerbriechen? Dir hutt de falsche President attackéiert.

(Hilarité)

Ech hu viru 25 Joer opgehale mat Raachen.

■ **Une voix.** - Très bien.

■ **M. Jean Huss (DÉI GRÉNG).** - Här President Scheuer, deen elo hei den Här President Weiler ersetzt, da kann ech Iech nëmme gratuléieren zu Ärem Schloss vu viru 25 Joer.

Ech géif Iech da wëlle bieden, dem Här President Weiler, deen de Moment net hei ass, matzedeelen, dass ech hie géif bieden, dass mer sollen déi Conventioncadre hei an der Chamber insgesamt unnen an net nëmme heibannen am Raum, mä a sämtleche Büroen, a sämtleche Bürossetzungen an an alle Raimlechkeeten, wou net een alleng an engem Büro sëtzt, well wann een alleng doranner sëtzt, da soll e kënnen fëmmen, well e jo dann nëmme sech selwer a senger Gesondheet schuet.

Ech mengen et wier wichteg, dass mer eis selwer géife mam Wuert huelen an do déi Saache maachen, déi mer da mussen maachen. Merci.

■ **Plusieurs voix.** - Très bien!

■ **M. le Président.** - Ech wäert dat do ausrichten, Här Huss. Als nächste Riedner ass den Här Aly Jaerling agedroen. Här Jaerling, Dir hutt d'Wuert.

■ **M. Aly Jaerling (ADR).** - Här President, ech wëll och der Madame Rapportrice félicitéieren fir deen ausféierleche Rapport, deen hei virbruecht ginn ass, an deen och dat erëmgëtt, wat d'Kommission an dësem Kontext festgehalen huet.

Lëtzebuerg huet de 16. am Heemount 2003 d'Kaderkonvention vun der Weltgesundheitsorganisation ënnerschriften. Dës Konvention wëllt aktiv géint de Konsum vum Tubak virgoen. Si ass och déi éischt Konvention vun der Weltgesundheitsorganisation, déi en Thema vun der Gesondheet direkt betrëfft.

Dës Tatsaach misst och déi Leit iwwerzeegen, déi nach ëmmer mengen, d'Fëmmen wier awer net esou geféierlech, an och mengen, dass d'Kampagn géint d'Fëmmen net onbedéngt eng vun de Prioritéiten vun enger gudder Gesondheitspolitik misst sinn.

Ech wëll hei net verfeelen drun ze erënneren, dass mäi Frënd, den Dokter Jean Colombero, a senger Interpellation iwwert de Kriibs - déi éischte Kéier iwwereng, dass iwwert de Problem vum Kriibs an der Chamber geschwat ginn ass -, virun zwee Joer schonn drop opmierksam gemaach hat, dass en Drëtter vun de Kriibserkrankungen duerch den Tubak verursaacht ginn an dass mer hei zu Lëtzebuerg sou schnell wéi méiglech Mesurë musse huelen, fir de Prozentsaz vun de Leit, déi fëmmen, däitlech ze reduzéieren.

Während senger Interpellation hat den Dokter Colombero fir d'Joer 2002 folgend Chiffere genannt: 35% vun de Männer fëmmen a 25% vun de Fraen, dat war eng Moyenne vun 30%.

Haut mussen mer feststellen, dass fir d'Joer 2004 36% vun de Männer a 36% vun de Frae fëmmen. Dat heescht, dass méi Leit haut fëmmen, wéi zu deem Zäitpunkt, wou den Dokter Colombero op d'Thema Kriibs an der Chamber opmierksam gemaach huet.

Mir wëssen, dass d'Prevention eng Politik vu laanger Dauer ass, mä hei zu Lëtzebuerg schéngt sech net vill ze bewegen, wat dat Thema ugeet.

Mir brauchen nëmme d'Chifferen ze kucken vun deene Leit, déi fëmmen. Am Joer 1987 hate mer 33% vun der Bevëlkerung, déi gefëmmt huet, 1993 waren et der 29, 1998 32, 2001 30, 2002 30, 2003 33 an 2004 31. Mir bleiwen also trotz der bishereger Preventionspolitik bei dem 30%.

Trotz all deem wat mer wëssen iwwert déi Schied, déi den Tubak urlicht, schéngen vill Leit sech de Konsequenz vum Fëmmen net bewosst ze sinn. Vlächent well se d'Konsequenzen dovun net direkt gesinn an d'Laangzäitschied ënnerschätzen. Kloer ass awer leider, dass eng vun dräi Kriibserkrankungen op de Konsum vum Tubak zrëckzeféieren ass.

No Aussoe vun der Fondation luxembourgeoise contre le cancer stierwen hei zu Lëtzebuerg all Joer méi wéi 500 Leit un de Suitë vum Genoss vum Tubak. Alleng dës Chiffere missten eis dach dozou bréngen méi aktiv géint den Tubak virzegoen a missten dach och all d'Fëmmerten erschrecken.

Säit 1987, säit bal 20 Joer, bleift d'Zuel vun deene Leit déi fëmmen bal konstant. Dat hätt och déi zoustänneg Leit drop opmierksam maache misse, dass an der Politik, déi se bedriwwen hunn, fir de Konsum vum Tubak ze reduzéieren, eppes net geklappt huet an dass zousätzlech Mesuren hätte geholl misse ginn, respektiv dass aner Mesuren hätte misse geholl ginn a mir hätten net op eng Weltgesundheitsorganisation dierfen ze waarden, fir festzustellen, dass mer e gravé Problem hunn an dass mer eppes hätte misse maachen.

Alleng d'Tatsaach, dass am Regierungsprogramm een eenzege Saz steet, deen den Tubak betrëfft: «Le Gouvernement déposera un projet de loi visant à améliorer la protection des non-fumeurs. Des consultations antitabac spécialisées seront offertes», weist drop hin, dass am Joer 2004 d'Wichtigkeet vun dësem Thema nach ëmmer net erkannt ginn ass.

Och wa mer et begrëssen, dass sech elo lues a lues eppes beweegt an dass d'Taxë liicht erhéicht gi sinn, ass et kloer, dass dës Mesure eleng net duergëet. D'Fondation luxembourgeoise contre le cancer huet iwwereng eng Erhéijung vum Präis vu mindestens 10% virgeschloen. Dës Erhéijung wier ëmsou méi wichteg, well se d'Zuel vu Persounen, déi fëmmen, virun allem bei Jugendlechen, erofsetze kënn. Déi Jugendlech hunn nach net esou vill Suen zur Verfügung. Dofir kann de Präis een Argument méi si fir ee Jugendlechen, sech géint d'Fëmmen ze decidéieren.

Déi Zuelen, déi eis zur Verfügung stinn, weisen drop hin, dass d'Opklärungscampagnë bei de Jugendlechen net genuch gräfen. Un de Chifferen, déi mer vun der Fondation luxembourgeoise contre le cancer hunn, ass net nëmme beonrouegend, dass d'Zuel vun deene Leit, déi fëmmen, net erofgeet, mä dass och de Prozentsaz vu

Jonken tëschent 18 a 24, déi fëmmen, lues awer sécher klëmmt.

2004 hunn 28% vun de Jugendlechen tëschent 16 a 17 Joer gefëmmt an 53% vun de Jugendlechen tëschent 18 a 24 Joer. 53% also, dass ass iwwert d'Halschent. Dës Chiffere sinn ëmsou méi beonrouegend, wa mer wëssen, dass déi Jugendlech, déi fréi ufänken ze fëmmen, méi Schwierigkeeten hu vum Fëmmen ewechzekomme wéi en Erwuessenen, deen eréischt méi spéit ufänkt.

Mir hunn d'Statistike vu Jugendlechen vum Alter vu 16 Joer un, wëssen, dass awer ëmmer méi fréi gefëmmt gëtt an dass et guer net rar ass e Jugendlechen mat 12, 13 Joer mat enger Zigarette an der Hand ze begéinen. Dofir misst besonnesch an deem Altersberäich méi intensiv preventiv gewierkt ginn an och mol festgestallt ginn oder analyséiert gi bei deene Jugendlechen, déi vu 16 Joer un an de Statistiken erfaasst ginn, ob déi net och scho mat 12, 13 Joer ugefaangen hu mat fëmmen. Dat ass nämlech eppes wat aus de Statistiken net erausgeet.

Här President, d'Campagne géint den Tubak ass en nationaalt Thema wat eis alleguer betrëfft an net nëmme déi Leit, déi fëmmen. A wa Leit mat de Konsequenz vun hirem Tubakskonsum liewe mussen - an hei wëll ech net iwwert d'Passivfëmmen schwätzen -, mussen mir als Solidargemeinschaft dës Konsequenz matdroen, iwwer eis Krankekeesen, iwwer eis Pensionkeesen, wa Leit duerch d'Konsequenz vum Tubak an d'Invalidéieren falen. Well loosst eis net vergiessen, den Tubak huet net nëmme Kriibs als Konsequenz, mä och Häerzproblemer an och Longeproblemer, déi et engem Mënsch onméiglech maache kënnen weiderzeschaffen.

Ech wëll hei nach eemol opgräifen, wat mäi Frënd den Dokter Colombero a senger Interpellation vun 2003 gesot huet. Mir mussen véier Mesuren esou schnell wéi méiglech aféieren: en effikasse Preventionssystem. Well d'Prevention virun allem bei de Jonken esou wichteg ass, misst besonnesch an deem Beräich alles op d'Bee gesat gi fir ze verhënnern, dass ugefaange gëtt mat fëmmen.

Zweetens, dass totaal Verbuet vun der Publicitéit a vum Sponsoring iwwer Tubak. Besonnesch bei deene Jonken, déi jo ëmmer ideal Virbiller sichen, a well Verschiedener sech dozou verleede loosse coolen Typë mat enger Zigarette am Bak oder mat enger Fläsch Cognac am Grapp gären nozeäieren. Dofir ass et wichteg, dass d'Publicitéit fir gesondheetsschiedlech Produiten iwwerhaupt verbueden oder zumindest staark muss ageschränkt ginn.

Dann drëtts en totaal Verbuet, fir an öffentleche Gebaier ze fëmmen. Dat Verbuet, dass schonn deelweis ausgeschwat ass, an et ass schonn hei gesot ginn, awer net esou richtig respektéiert gëtt, misst generaliséiert, awer och kontrolléiert ginn, wou awer kloer misst definéiert ginn, wat öffentlech Gebaier sinn. An de Spideeler zum Beispill ass et verbueden ze fëmmen, et ginn awer ofgetrennte Fëmmecken ageriicht. A wann Der do d'Dier opmaacht, da kritt dee ganze Stack eng Nikotininhäléierung. Esou schlëmm ass et wann een d'Fëmmen an engem Eck konzentréiert, wou dann och nach net déi néideg Entlüftung ass.

Dat heescht also, wann ee Fëmmecken ariicht, dann awer och wann ech gelift mat deenen néidegen Entlüftungen, fir net dass, wann een d'Dier opmécht, dann awer d'ganz Noperschaft mat eng Nikotinkris kritt!

D'Fro stellt sech vum Fëmmen op der Aarbechtsplaz an och do a besonnesch a geschlossene Raim stellt sech dann d'Fro vum Passivfëmmen an do missten d'net Fëmmerten op déi eng oder aner Aart a Weis geschützt ginn. Et ass

natierlech ze soen, e generell Verbuet op der Aarbechtsplaz ze fëmmen, géif zum Beispill an engem Stolvierk zur Farce ginn, well een do jo awer nach aner Saachen anotem wéi den Tubaksdamp a wou ech da mengen, dass den Tubaksdamp nach dee mannste Problem wier.

D'Fëmmverbuet an de Restaurante war an der leschter Zäit en héichgespilltent Thema, dat een och manner emotional hätt kënnen ugoen. Et ass e Fait, dass do, wou Fëmmverbueder sinn, wéi an de Fligieren, respektiv an de Kinoen, wou et ausgeschwat ginn ass, sech dru gehale gëtt. Mir sinn awer, am Zesammenhang mat de Restauranten an de Caféen, fir méi e soft Virgoen. Mir sinn der Meinung, dass et eventuell géif duergoen, dass een an de Fënstere vun den Etablissementer kloer misst schreiwen, hei gëtt gefëmmt oder hei gëtt net gefëmmt. Oder dass publizéiert gëtt, dass getrennte Raimlechkeeten do si fir d'Fëmmerten an d'net Fëmmerten, dann hätt jiddfereen de Choix.

Mä wat awer hei vlächent als Mesure vergiess ginn ass ze soen, dass wier zum Beispill wann nei Raimlechkeeten, öffentlech Raimlechkeete gebaut ginn, iwwert de Kommodo-Inkommodo, eng adequat Entlüftung mat virzeschreiwen. Dat wier och e Wee fir effektiv deem Problem entgéintzekommen. Well de Problem vum Matfëmmen ass jo dee Problem meeschtens vun enger schlechter Entlüftung oder vun enger klorer Oftrennung vu Fëmmraim an net Fëmmraim. Dofir géif ech mengen, dass awer iwwert de Wee vun der Kommodo-Inkommodo-Prozedur bei neie Gebailechkeeten, déi fir d'Öffentlechkeet ageriicht ginn, och misst dofir gesuergt ginn, dass eng adequat Entlüftung misst mat virgesi ginn.

Da véiertens eng Politik vun héijen Tubakspräisser. Wa mer eng Politik vun héijen Tubakspräisser wëllen ugoen, dann awer mat zwee Objektiv. Éischstens natierlech fir méi Leit vum Fëmmen ofzehalen, besonnesch Jonker. An zweetens awer, dass déi Suen, déi zousätzlech do erakommen, awer dann och mussen der Sécurité sociale zegutt kommen, dass heescht am Fong d'Institution, déi fir d'Schied muss opkommen.

A Frankräich hu se déi Politik vun héije Präisser bedriwwen an dunn hu se da mat Houfert festgestallt, dass de Kaf vun Zigaretten erofgaangen ass. An ech betounen de Kaf, awer net onbedéngt de Konsum, well besonnesch an de Grenzgebiddern vu Spuenien a Lëtzebuerg, wou d'Zigarette bal zwee Euro de Pak méi bëlle sinn, do bléit de Schwarzhandel.

Wann een zum Beispill a Lëtzebuerg ausrechent, wéi vill Zigaretten dass verkaaft ginn, an ee weess, dass nëmme 33% vun de Leit fëmmen, da misst theoretesch all Fëmmert 136 Päck Zigaretten den Dag fëmmen, fir dat, wat hei am Land verkaaft gëtt, opzebrauchen. Beim Bensin ass et zum Beispill ähnlech. Do misst jiddfereen 1.600 Liter op 100 Kilometer verbrauche fir dee Konsum vu Bensin hei opzebrauchen, deen eleng hei am Land verkaaft gëtt, fir nëmme ee Beispill ze ginn. An do gesäit ee jo, wéi de Schwarzhandel am Fong besonnesch mat den Zigarette bléit.

Och wa mer eis nëmme fir Lëtzebuerg zoustänneg fillen, esou schéngt et mer awer, dass mer am Interesse vun de Leit an eisen Nopeschlänner misste mathëllefen dem Schwarzhandel, dee manifestement méi Émsaz huet wéi eise legale Maart, een Enn ze setzen.

Wat eis hei am Land betrëfft, do kënnen mer nëmme hoffen, dass esou schnell wéi méiglech déi noutwendeg Mesurë geholl gi fir dës Kaderkonvention ëmzesetzen.

Elo hu mer vun der Weltgesundheitsorganisation eng Basis vir-

geluecht kritt, op där mer kënnen schaffen a wou mer dat Beschta am Interesse vun de Fëmmerten an net Fëmmerten an eisem Gesondheetswiese kënnen maachen.

Wann ech elo nach eng Kéier un d'Fëmmen an de geschlossene Raim erënneren, dann erlaabt mer, dass ech awer hei eng Bemierkung géif maachen, déi mer awer wichteg schéngt. Wann een d'Wiel huet an e Raum ze goe fir ze fëmmen oder net ze fëmmen, da geet een eran oder et geet een net eran, mä da kënnt ee gewéinlech awer eraus an eng vun der Industrie verschmotzte Loft, wou een net ka fortlafen a wou et endlech un der Zäit wier, dass mer dat Thema och emol eng Kéier géifen am Interesse vun der Gesondheet vun de Mënschen hei am Land zur Diskussioun bréngen; mer och emol eng Kéier géifen driwwer schwätzen, wat fir eng Schied, dass d'Ëmweltverschmutzung duerch d'Industrie hei am Land uricht.

An deem Sënn soen ech lech Mer-ci a mir géife selbstverständlech déi Konventioun hei och stëmmen.

M. le Président. - Merci, Här Jaerling. D'Regierung huet elo d'Wuert. Den Här Gesondheetsminister Mars Di Bartolomeo.

M. Mars Di Bartolomeo, *Ministre de la Santé et de la Sécurité sociale.* - Här President, Dir Dammen an Dir Hären, ech si ganz frou, dass mer haut d'Geleeënheet hu fir dës Konventioun ze stëmmen an domat en Text ze ratifizéieren, dee mer als ee vun deenen éischten ënnerschriwwen haten, schonn am Joer 2003.

(M. Lucien Weiler reprend la Présidence)

Et ass e wichtegen Text, wou d'international Communautéit sech eens ginn ass, dass den Tubak a staarkem Mooss gesondheetschiedlech ass an dass et wichteg ass sech en Aktiounsprogramm ze ginn, fir där Gesondheetsschiedlechkeet entgéintzewirken. Dat war en Duerchbroch, dee sengerzäit erreecht gi war, well déi Unanimitéit bis dunn net bestanen hat, och wann d'Wëssenschaft scho laang zu där Evidenz komm war, dass d'Fëmmen an all Alter, besonnesch awer bei deene ganz Jonken, an extrem héije Mooss gesondheetsschiedlech ass.

E puer Chifferen niewent deenen, déi virdru genannt gi sinn: Néng vun zéng Longekriibse sinn op d'Fëmmen zréckzeféieren. Bei den Häerzinfarkter ass d'Proportioun zwar net grad esou héich, mä do ass ëmmer nach d'Fëmmen ee vun den Haaptfacteuren, déi zu den Häerzinfarkter féiere kënnen. Bei enger ganzer Rei vun aneren organeschen Erkrankungen ass den Tubak zumindest matschëlleg.

Den Tubak ass och matschëlleg, dass ganz vill Leit stierwen. Zu Lëtzebuerg sinn et der 600, also vill méi wéi déi Affer, déi mer an dem Stroosseverkéier hunn, a vill méi wéi déi, déi mer duerch den illegalen Drogenkonsum hunn. Ech wëll net soen, dass déi aner Faiten ze bagatelliséiere sinn, mä ech wëll dat just als Argument huelen, fir dass mer eis endlech och ëm déi dote bekannten Doudes- a Krankheetsursaach vill méi këmmere wéi an der Vergaangenheet, well den Tubak, dat soll een esou soe wéi et ass, ass ee vun deene bekannten an Haaptkrankmécher, déi et op dëser Welt gëtt. Also ass et eis Verantwortung fir dorop ze reagéieren.

Ech sinn numol net Tubaksminister, ech si Gesondheetsminister, a wann ech déi doten Erkenntnis hunn, da muss ech mech dofir asetzen, fir alles wat méiglech ass ze maachen, fir d'Leit virun den negativen Folge vum Tubakskonsum ze schützen.

Mir stinn net eleng do, wa mer déi Konventioun haut ratifizéieren. Et sinn iwwer 100 Länner, déi se ënnerzeechent hunn; et sinn an der Zwëschenzäit 64 Länner, déi se ra-

tifizéiert hunn. Mir sinn dat 65. Land. Et sinn 13 europäesch Memberstaaten, déi se ratifizéiert hunn. Mir sinn de 14., also ass et eng grouss Majoritéit, déi hannert der Konventioun steet.

Ech wollt eigentlech haut aus där Konventioun net eng Orientéierungsdebat maache fir déi nächst Schrëtt, déi mer maachen, mä ech sinn awer dem Här Bettendorf ganz dankbar, dass en dat gemaach huet, aus dëser Diskussioun iwwert d'OMS-Konventioun eng Orientéierungsdebat, wéi mer solle virufueren, well ech hunn eigentlech vu véier oder fënnf Fraktiounen bedingungslos d'Zoustëmmung kritt, fir dee Wee ze goen, deen d'Regierung aschleift, ech hu just vun enger Fraktioun gesot kritt, dass mer ze radikal wäeren.

Wann ech also d'Konklusioun zéien, dann ass eng ganz grouss Majoritéit an dëser Chamber der Meinung, dass dee Wee, dee mer an der Regierungserklärung ageschloen hunn, an dee mer elo mat enger ganzer Rei vu konkrete Moossname wëllen ëmsetzen, dee richteg Wee ass.

Ech zéien, mengen ech, dann d'Konklusioun doraus, dass mer sollen op deem dote Wee virufueren. Wann ech dat gewusst hätt, wann ech déi Méiglechkeet gehat hätt, Här President, dann hätt ech eng Motioun abruecht, mä leider kann...

M. le Président. - Déi Zäite sinn eriwuer.

(Hilarité)

M. Mars Di Bartolomeo, *Ministre de la Santé et de la Sécurité sociale.* - Déi Zäite si leider eriwuer.

Ech stelle fest, dass eng Fraktioun, an zwar d'DP, géint dat Fëmmverbuet an de Restauranten ass, esou wéi ech dat virgeschloen hunn. Ech hu keng aner...

(Interruptions)

Ech hu keng aner Stëmme jidde-falls dozou héieren.

(Interruption)

Ech wëll bei dëser Geleeënheet der Rapportrice e ganz grouse Merci soe fir deen excellente Rapport an och de Kolleegen aus der Chamber fir déi gutt Interventiounen.

Ech sinn och frou, dass d'Kolleege vun der DP kloer gesot hunn, dass se hannerun där Konventioun stinn. Dat war net ëmmer esou kloer, well Dir wësst, dass ënnert der viregter Regierung den deemolege Gesondheetsminister zwar proposéiert hat fir se ze ratifizéieren, mä sai Kolleeg Wirtschaftsminister der Meinung war, dass ee soll waarde bis dass d'europäesch Direktiv géif virleien. Deemools huet d'Regierung dat - ech kann lech d'Texter weisen...

M. le Président. - Här Di Bartolomeo, erlaabt Der eng Zwësche-fro vum Här Wagner?

M. Henri Grethen (DP). - Här President, ech géif den Här Minister invitéieren, fir fir dat, wat en elo hei gesot huet, dann och de Bewäis ze bréngen...

M. Mars Di Bartolomeo, *Ministre de la Santé et de la Sécurité sociale.* - Jo, ech trieden deen un. Ech hu just déi Dokumentatiounen net bei mer, well ech net mat Regierungsréitberichter vun zéng Joer dorëmmer lafen, mä ech ginn, Här President, wann Dir dat wëllt...

M. Henri Grethen (DP). - Sou laang ware mir net an der Regierung.

(Hilarité)

M. Mars Di Bartolomeo, *Ministre de la Santé et de la Sécurité sociale.* - ...lech déi doten Dokumentatioun bei där nächster Geleeënheet selbstverständlech op den Dësch vun dëser Chamber.

M. le Président. - Här Minister, erlaabt Der eng Zwësche-fro vum Här Wagner?

M. Carlo Wagner (DP). - Neen, Här President, keng Zwësche-fro, mä just awer eng Richtegstellung. Den Här jëtzege Minister huet vläicht...

M. le Président. - Dat ass zwar de Moment net virgesinn, Här Wagner, mä wann de Minister d'accord ass, dann ass et an der Rei.

M. Carlo Wagner (DP). - Gliff?

M. le Président. - Dat ass net esou virgesinn, Dir kënnt Froe stellen, mä fir Kommentaren ze maachen...

M. Carlo Wagner (DP). - Ech stellen dem Här Di Bartolomeo d'Fro, ob en eben d'Lëtzebuurger Positioun, wat den Tabagissem ubelaangt um europäeschen Niveau an deene leschte Joren net suivéiert huet.

Et ass nämlech esou, dass Lëtzebuerg op europäeschem Niveau zu Brëssel sämtlech Initiativen, wat den Tabagissem ubelaangt, sämtlech Direktive matgedroen huet. Dat just als Richtegstellung, mä meng Fro war dann: Weess de Minister dat net?

(Hilarité)

M. Mars Di Bartolomeo, *Ministre de la Santé et de la Sécurité sociale.* - Ech weess selbstverständlech, Här Exminister, dass Lëtzebuerg ënner Ärer Regie sech ugeschloss huet un de Recours vun deenen Däitsche vis-à-vis vun där Direktiv, déi am Moment ënnerwee ass, an dat och d'Argumentatioun war, fir dës Konventioun net ze ratifizéieren.

Dat kënnt Dir nokucken, an Dir wësst dat, well do gëtt et Bréifwieselen zwëschen Ärem fréiere Ministère an anere Regierungsstellen, déi dat beleen, well Dir hutt selwer - an ech kann lech do deen Text ginn, deen hunn ech nämlech dobäi - der Regierung proposéiert, Här Exminister, dass se soll ratifizéiert ginn, mä d'Regierung ass lech net op deem dote Wee gefollegt. A wann Dir éierlech sidd, da gitt Dir dat zou.

M. Henri Grethen (DP). - Ech hunn eng Fro un de Minister: Wat fir eng Regierungskompositioun war et, déi dës Konventioun ënnerschriwwen huet an hei am Parlament déposéiert huet?

M. Mars Di Bartolomeo, *Ministre de la Santé et de la Sécurité sociale.* - A wat fir eng war et, déi se ratifizéiert huet, a wat fir eng war et, déi se net ratifizéiert huet?

Ech huele meng Kolleegen als Zeien, déi hei setzen, dass et net esou evident war, fir se ze débloquentéieren, well Dir se gutt zougemauert hat.

M. Henri Grethen (DP). - Vous êtes un populiste!

M. Mars Di Bartolomeo, *Ministre de la Santé et de la Sécurité sociale.* - Här President, ech géif...

M. le Président. - Loosst eis zur Serenitéit zréckkommen, a fuert Dir mat Ären Ausféierunge weider.

M. Mars Di Bartolomeo, *Ministre de la Santé et de la Sécurité sociale.* - Voilà! Ganz gär, ganz gär!

Ech stellen also fest, dass eng eenzeg Fraktioun an där Orientéierungsdebat, déi mer hei hunn, net op der Positioun vun der Regierung ass.

(Interruptions)

M. le Président. - Här Di Bartolomeo, erlaabt Dir eng Tësche-fro vum Här Jaerling?

M. Mars Di Bartolomeo, *Ministre de la Santé et de la Sécurité sociale.* - Jo, selbstverständlech.

M. le Président. - Här Jaerling, Dir hutt d'Wuert.

M. Aly Jaerling (ADR). - Här Minister, ech wollt froen, ob Dir nogelauschtert hutt wéi ech geschwat hunn.

(Hilarité)

M. Mars Di Bartolomeo, *Ministre de la Santé et de la Sécurité sociale.* - Selbstverständlech, an ech war mat ganz ville Punkte vun lech d'accord.

M. Aly Jaerling (ADR). - Da misst Dir jo awer héieren hunn, dass ech gesot hunn, dass mir net mat engem absolute Fëmmverbuet d'accord sinn, an dass mir aner Propositionen gemaach hunn, wéi zum Beispill gesot hunn, dass mer et de Restaurateure fräiloossen oder zu de Restaurateure soen, si sollen an hirer Fënster ukënnegen, hei gëtt gefëmmt an hei gëtt net gefëmmt, oder se sollen ubréngen, mir hu Fëmmecken an net Fëmmecken.

Ech hunn och eng Propos gemaach, do zousätzlech iwwer Kommodo an Inkommodo bei neie Gebaier eventuell Entlüftungen an deene Raimlechkeeten eranze-maachen.

Mä mir hunn eis net kloer fir e Fëmmverbuet ausgeschwat. Dat ass falsch! Dat ass falsch!

M. Mars Di Bartolomeo, *Ministre de la Santé et de la Sécurité sociale.* - Et ass ganz interessant ze wëssen, dass Dir dann net fir d'Fëmmverbuet an de Restauranten sidd.

(Hilarité)

Ech muss lech soen...

Une voix. - Den Här Colom-bera wär bestëmmt dofir!

M. Mars Di Bartolomeo, *Ministre de la Santé et de la Sécurité sociale.* - Jo, den Här Colom-bera huet och an déi dote Richtung plädéiert, mä den Här Colom-bera ass leider net méi do. Mä zréck...

(Interruptions diverses)

M. le Président. - Neen, Här Jaerling, ech mengen, et wier elo alles gesot. Loosse mer elo dem Här Minister nolauschten a sengen Ausféierungen. Dir hutt d'Méiglechkeet fir herno eropze-kommen an ze soen, wat Dir nach um Häerz hutt.

M. Mars Di Bartolomeo, *Ministre de la Santé et de la Sécurité sociale.* - Här President, Dir Dammen an Dir Hären, ech wëll am Zesummenhang mat där Orientéierungsdebat, déi mer haut de Mët-teg hunn, drop hiweisen, dass de Regierungsprogramm an deem dote Punkt ganz kloer ass. D'Preventioun vu Suchtkrankheeten - an et sinn net nëmmen zwou Zeile gewiescht, déi doriwwer am Regierungsprogramm waren -, ob dat Suchtkrankheete sinn, déi op sou genannte legal Drogen zréckze-féiere sinn, wéi och Suchtkrankheeten, déi op illegal Drogen zréckzeféiere sinn, d'Preventioun dovun huet am Regierungsprogramm eng alleréischte Prioritéit, dat gëllt fir d'Preventioun virun Alkohol-, Tubaks- awer och Medikamen-sofhängegkeet.

D'Regierung huet ugekënnegt, dass se e Gesetz géif deponéieren, dat de Schutz vun deenen, déi net fëmmen, verbessert. D'Regierung huet ugekënnegt, dass se spezialiséiert Consultatiounen, fir vum Tubak lasszecommen, géif ubidden. All dat wär ze maachen an all dat sinn och Punkten, déi an der OMS-Konventioun virgeschloe

ginn, sou dass mer eng ganz Rei vu Punkten, déi an der OMS-Konventioun stinn, an deenen nächste Wochen a Méint wäerte mat Liewe fëllen.

Ech wëll och soen, dass déi Initiativen, déi mer huelen a Saache Schutz virum Tubak, nëmmen een Element sinn, mä e wichteg Element vun deem Gesondheetsplang, dee mer amgaang sinn opstellen. An ech sinn dofir frou, dass d'Martine Stein drop higewisen huet, dass virun zéng Joer, ënnert dem Johnny Lahure, e ganz gutt Wäissbuch opgestallt ginn ass. Mir sinn och amgaang als Basis vum Gesondheetsplang dat Wäissbuch ze aktualiséieren.

Wéi geet et elo weider no dem Vote vun der OMS-Konventioun? Mir wäerte ganz schnell de Bilan vun deem 89er Gesetz zéien, wou eng Rei vu Moossname scho realiséiert gi sinn, déi elo an der OMS-Konventioun widderholl gi sinn. Mir wäerten e Gesetz deponéieren an der Chamber - ech hoffe virun der grousser Vakanz -, wou eng ganz Rei vun Elementen an der Transposition vun der Regierungserklärung wäerte kommen. Dozou gehéiert d'Recht, d'verbréiftent Recht, fir dampfräi kënnen ze iessen. Hei geet et net ëm Initiative géint Fëmmerten, mä fir elementar Rechter fir ouni Dampf dierfen ze genéissen.

Da wäerte mer an deem Gesetz d'Interdiction de vente vun Tabaks-produkten u Mineure proposéieren - och dat ass en Element, dat an der OMS-Konventioun ass - a gläichzäiteg och en anere Punkt aus dem Regierungsprogramm realiséieren, nämlech d'Interdiction de vente vun Alkohol oder Alko-pops u Mannerjähreger.

Dann och Prezisiounen a Saache Publizitéit, wou aner Schrëtt iwwert d'EU-Direktiv wäerte kommen, déi méi incisiv wäerte sinn.

Dann hu mer eng ganz gutt Zesummenaarbecht mat der Educati-onsministesch a mam Aarbechtsminister engagéiert fir éisch-tens an de Schoulen zousätzlech Schrëtt ze maache géint Ofhängegkeet, zweetens Schrëtt ze maachen an der Aarbechtswelt fir kënnen de Schutz vum net Fëmmert ze verbessern.

Mir kommen do ganz gutt virun a mir hunn am Moment eng Initiativ lafen zesumme mat de Spideeler fir tubaksfräi Spideeler ze avantagéieren. Dat ass ee vun de Schwéierpunkten, déi an dëser Campagne dëst Joer wäerte lancéiert ginn an dem Hierscht wäerte mer eng cibléiert Campagne a Richtung Jugenderlecher maachen, wou den Haaptmotto ass: „Loosse se stiechen.“ Well dorëm geet et, een deen d'Zigareten zu deem richtigen Alter stieche léisst, dee brauch herno net dovun entwintt ze ginn.

Här President, Dir Dammen an Dir Hären, et sinn e puer Suggestiounen komm - just ganz kuerz dozou -, déi ganz gutt waren, déi ech och ganz gären ënnerstëtzt hätt, wéi zum Beispill, mat der Horesca eens ze gi fir fräiwëlleg Restauranten ouni Tubak ze entaméieren. Ech wëll soen, dass dat iwwer Jore scho méiglech war an dass ech dat Ugebuert virun dräi Méint och un d'Horesca gemaach hunn. Sage und schreibe ee Restaurant huet an der Zwëschenzäit sech als dampfräi deklaréiert, dat ass d'Postkutsch zu Esch. Fir déi, déi net wëssen, wéi agréabel dass et ass ouni Dampf ze iessen, kann ech lech...

(Interruptions)

M. le Président. - Dir musst awer elo net onbedéngt Propaganda hei maachen, Här Minister.

(Hilarité et interruptions)

An dann ass et och esou lues Zäit, datt Dir zum Schluss kommt.

M. Mars Di Bartolomeo, *Ministre de la Santé et de la Sécurité sociale.*

rité sociale.- Jo, selbstverständlich, Här President.

Ech hunn héieren zu Dikrech wär och ee Restaurant, deen dat géif envisagéieren, dee kënne mer dann och an nächster Zukunft nennen.

M. le Président.- Sou, Här Minister, kommt zum Schluss, wann Dir wëllt.

M. Mars Di Bartolomeo, *Ministre de la Santé et de la Sécurité sociale*.- Ech kommen zum Schluss.

Här President, ech mengen, et ass e ganz eeschte Sujet iwwert dee mer diskutéieren. RTL hat fir den 1. Abrëll e Witz lancéiert, deen drop erausgelaf wär, dass een deene Leit, déi wëllen ophale mat fëmmen, géif eng Prime ginn. Dat war selbstverständlich en Abrëllsgeck. Op deen dote Wee wäerte mer net goen, mä ech mengen, an ech widerhuelen dat nach eng Kéier, wat ech scho gesot hunn: All deene Leit, déi ophale mat fëmmen oder net domat ufänken, kann een eng Prime ubidden, déi wäertvollst Prime, déi een hinne kann ubidden, nämlech d'Gesondheet. Een deen net fëmmt lieft méi laang a lieft virun allem besser.

Ech soen Iech Merci.

(Interruptions diverses)

M. le Président.- Merci, Här Minister. Den Här Jaerling huet d'Wuert nach eng Kéier gefrot. Här Jaerling, op Grond vu wéi engem Artikel vum Reglement frot Dir Iech d'Wuert?

M. Aly Jaerling (*ADR*).- Ech kennen d'Reglement net auswendig, Här President...

(Hilarité)

..., mä ech weess awer, dass ech d'Recht hunn, fir nom Här Minister ze schwätzen.

M. le Président.- Also Parole après ministre.

M. Aly Jaerling (*ADR*).- Jo, ech géif schonn en Artikel fannen, also do ass kee Problem.

Une voix.- Genau.

M. le Président.- Da faasst Iech kuerz.

M. Aly Jaerling (*ADR*).- Dat maachen ech ëmmer.

Ech wëll just kloerstellen, dass ech net kann zouloossen, wann den Här Minister hei eng Desinformatioun mécht iwwert dat wat den Här

Colombero hei gesot huet. Den Här Colombero huet zu kengem Moment de Radikalismus hei am Zusammenhang mam Fëmmen gepriedegt. Den Här Colombero huet hei virun dräi Joer dat gemaach...

(Interruption)

..., wat d'Regierung virdru scho laang hätte solle maachen, an zwar konkret Proposen hei op den Dësch geluecht, wéi ee géint d'Fëmmen kann ugoen.

An dann déi zweet Saach, wou Dir elo...

(Interruption)

Gelift?

(Interruption)

Neen.

An da kënnt déi zweet Saach, Här Minister. Dir hutt hei gesot, dat mat enger Prime ze gi fir d'Fëmmerten, dat wär eng Farce. Ma da wëll ech Iech soen: Sou laang, wéi Dir d'Erhéijung vum Tubak am Index dra loosst, da gitt Dir de Fëmmerten eng Prime, well da maacht Dir se méi räich, fir hir Zigaretten ze kafen. Dofir stellen ech Iech dann d'Fro: Sidd Dir dann och bereet d'Erhéijung vum Tubak aus dem Index erauszehuelen?

M. le Président.- Merci, Här Jaerling. Vlächcht eng Äntwert dozou, Här Minister?

M. Mars Di Bartolomeo, *Ministre de la Santé et de la Sécurité sociale*.- Jo, ganz, ganz gären, Här President. Selbstverständlich hu mer hei net d'Geleeënheet, fir all déi gesammelt Wierker vum Här Colombero nach eng Kéier nozeliesen, mä ech géif Iech déi awer...

(Brouhaha général)

...nach eng Kéier presentéieren. Selbstverständlich huet dës Regierung och e Gesamtkonzept iwwert d'steierlech Behandlung vun den Zigaretten a vum Tubak, a selbstverständlich huet dës Regierung och Virstellungen, wéi een, wann een Taxë fir gesondheetlech Zwecker an Taxen aus gesondheetlechen Iwwerleeunge schaaft déi da répercutéiert am Index. Déi Diskussioun ass awer net ofgeschloss.

Merci.

Une voix.- Très bien.

M. le Président.- Voilà, Dir Dammen an Dir Hären, domat si mer um Enn vun der Diskussioun zu dësem Projet ukomm. Mir kom-

men elo zur Ofstëmmung iwwert de Projet de loi 5419.

Vote sur l'ensemble du projet de loi et dispense du second vote constitutionnel

De Projet de loi ass eestëmmeg ugeholl mat 60 Jo-Stëmmen.

Ont voté oui: Mme Nancy Arendt (par M. Laurent Mosar), M. Lucien Clement, Mmes Christine Doerner, Marie-Josée Frank, Marie-Thérèse Gantenbein-Koullen, MM. Marcel Glesener, Norbert Hauptert, Mme Françoise Hetto-Gaasch, MM. Ali Kaes, François Maroldt, Paul-Henri Meyers, Laurent Mosar, Marcel Oberweis, Patrick Santer (par M. Marcel Sauber), Marcel Sauber, Jean-Paul Schaaf, Marco Schank, Marc Spautz, Mmes Nelly Stein, Martine Stein-Mergen, MM. Fred Sunnen, Lucien Thiel, Lucien Weiler et Michel Wolter;

MM. Marc Angel, Alex Bodry, John Castegnaro, Mme Claudia Dall'Agnol, M. Fernand Diederich, Mme Lydie Err (par M. Romain Schneider), MM. Ben Fayot, Jean-Pierre Klein, Mme Lydia Mutsch, MM. Roger Negri, Jos Scheuer, Romain Schneider, Roland Schreiner et Mme Vera Spautz (par M. Roger Negri);



Chambre
des Députés
L U X E M B O U R G

Chamber TV
weist all
öffentlech Sëtzung
live an integral

An der Stad
um Kanal S29 (Coditel) oder
um Kanal S40 (Eltrona/Siemens)

Zu Esch
um Kanal S24 / 455.25 Mhz

An der Gemeng Déifferdang
um Kanal S29

An der Gemeng Diddeleng
um Kanal S32

An der Gemeng Nidderaanwen
Kanal S29

An der Gemeng Bartreng
um Kanal S40 / 455.25 Mhz

Zu Walfer
um Kanal S29 / 367.25 Mhz

Zu Biwer an zu Wecker
um Kanal S40 / 455.25 Mhz

An der Gemeng Bous
um Kanal S40 / 455.25 Mhz

An der Gemeng Bërmereng
um Kanal S40 / 455.25 Mhz

An der Gemeng Konter
um Kanal S40 / 455.25 Mhz

An der Gemeng Dippech
um Kanal S40 / 455.25 Mhz

An der Gemeng Dikrech
um Kanal S19 / 287.25 MHZ

Zu Iermsdref
um Kanal S40 / 455.25 Mhz

Zu Esch-Sauer
um Kanal S40 / 455.25 Mhz

Zu Nidder- an Uewerfeelen
um Kanal S40 / 455.25 Mhz

An der Gemeng Gréiwemaacher
um Kanal S40 / 455.25 Mhz

An der Gemeng Hieffenech
um Kanal S40 / 455.25 Mhz

An der Gemeng Hesper
um Kanal S40 / 455.25 Mhz

Zu Kielen (& Brameschhaff),
Keespelt, Meespelt,
Ollem a Nouspelt
um Kanal S40 / 455.25 Mhz

An der Gemeng Mamer
um Kanal S40 / 455.25 Mhz

An der Gemeng Manternach
um Kanal S40 / 455.25 Mhz

An der Gemeng Medernach
um Kanal S40 / 455.25 Mhz

MM. Xavier Bettel (par M. Niki Bettendorf), Niki Bettendorf, Mme Anne Brasseur (par M. Emile Calmes), M. Emile Calmes, Mme Colette Flesch, MM. Charles Goerens, Henri Grethen, Paul Helming, Claude Meisch (par M. Henri Grethen) et Carlo Wagner;

MM. Claude Adam, François Bausch, Félix Braz, Camille Gira, Jean Huss, Henri Kox et Mme Viviane Loschetter;

MM. Gast Gibéryen (par M. Robert Mehlen), Jacques-Yves Henckes, Aly Jaerling, Jean-Pierre Koepp et Robert Mehlen.

Gëtt d'Chamber d'Dispens vum zweete Vote constitutionnel?

(Assentiment)

Dann ass et esou décidéiert.

Éier mer dann zum nächste Punkt...

(Interruption)

Jo, Här Huss?

M. Jean Huss (DÉI GRÉNG).- Ech si frou, datt dat unanimement esou décidéiert ginn ass. Ech hat a menger Ried, do war Dir leider net hei, dofir wollt ech lech dat kuerz widderhuelen...

M. le Président.- Ech hunn Är Ried héieren, Här Huss, maacht lech guer keng Suergen, ech kennen Är Interventioun.

M. Jean Huss (DÉI GRÉNG).- Hutt Dir dann och matkritt, datt ech lech gebieden hunn, datt Dir sollt suergen, datt wa mer e Gesetz hei stëmme wat an déi do Richtung geet, datt mer dat och hei sollen uwennen?

M. le Président.- Jo, ech hunn Är Ried ganz héieren, integral, Här Huss, maacht lech guer keng Suergen.

(Hilarité et interruptions)

A fir de Rescht ass et de Büro vum der Chamber, deen décidéiert wéi mer an där do Prozedur virginn.

Éier mer elo zum nächste Projet vum Ordre du jour kommen, wëll ech dem Här Wirtschaftsminister, dem Här Krecké d'Wuert ginn, dee wëllt en Dépôt maachen. Här Minister Krecké.

3. Dépôt d'un projet de loi

M. Jeannot Krecké, Ministre de l'Économie et du Commerce extérieur.- Här President, et freet mech lech matzedeele, dass de Grand-Duc mech mat Datum vum 25. Abrëll beoptraagt huet an d'Autorisatioun ginn huet, hei e Projet de loi ze déposieren, deen heescht, autorisant l'État à fournir une garantie bancaire pour la réalisation et l'exploitation d'un réseau de chaleur urbain.

- *Projet de loi 5471 autorisant l'État à fournir une garantie bancaire pour la réalisation et l'exploitation d'un réseau de chaleur urbain.*

Voilà, Här President.

M. le Président.- Ech ginn dem Här Minister Akt vum Dépôt vum deem Projet de loi, deen un déi zoustänneg Chamberskommission weidergeleet gëtt.

Dann, Dir Dammen an Dir Hären, komme mer zum nächste Punkt vum eisem Ordre du jour, dat heescht zur Diskussioun vum Projet de loi 5432, d'Konventioun iwwert d'Schafung vum enger Agence spatiale européenne. D'Riedezäit ass nom Modell 1 festgeluecht. Bis elo sinn ageschriwwen: den Här Thiel, d'Madame Flesch an den Här Angel. D'Wuert huet elo de Rapporteur vum Projet de loi, den honorabelen Här Marcel Oberweis.

4. 5432 - Projet de loi portant approbation - de la Convention portant création d'une

Agence spatiale européenne, faite à Paris, le 30 mai 1975 - de l'Accord entre les États parties à la Convention portant création d'une Agence spatiale européenne et l'Agence spatiale européenne concernant la protection et l'échange d'informations classifiées, fait à Paris, le 19 août 2002 - de l'Accord entre le Gouvernement du Grand-Duché de Luxembourg et l'Agence spatiale européenne relatif à l'adhésion du Grand-Duché de Luxembourg à la Convention portant création de l'Agence spatiale européenne et des clauses et conditions s'y rapportant, fait à Paris, le 6 mai 2004

Rapport de la Commission de l'Enseignement supérieur, de la Recherche et de la Culture

M. Marcel Oberweis (CSV), rapporteur.- Här President, Dir Dammen an Dir Hären, Här Minister, et fällt mir e bësse schwéier fir lech an de Weltraum matzehuelen, mat deenen terrestresche Problemer, déi mer hei gewenzelt hunn.

(Hilarité)

Mir hunn et hei mat engem Projet ze dinn, deen eng Konventioun an zwee Accordë soll ëmsetzen. D'Konventioun befaasst sech mat der Kreatioun vum der europäescher Weltraumagence aus dem Joer 1975. Den éischten Accord behandelt dann d'Protection an den Echange vu klassifizierten Informationsen aus dem Joer 2002. Den zweeten Accord, deen interessantsten dovunner, ass dee mat der Membership vu Lëtzebuerg bei der europäescher Weltraumagence, der ESA, aus dem Joer 2004.

Wéi ech dee Rapport geschriwwen hunn, hat ech dauernd e Bild viru mer. Ech hat d'Bild viru mer vum 21. Juli 1969. Deemools wor ech Zeie ginn, wéi den Neil Armstrong deen éischte Schrëtt gemaach huet bei der Moundlandung. En huet gesot deemools, op englesch zwar: „Ee klenge Schrëtt fir mech, mä ee gewaltege Schrëtt fir d'Mënschheet.“

An esou ee gewaltege Schrëtt mécht och Lëtzebuerg haut, andeem et dann der ESA bäitritt.

De Projet selwer ass déposiert ginn de 17. Januar 2005, den Avis vum Statsrot kouw eran den 22. Mäerz, an der Chamberskommission ass alles den 14. Abrëll erkläert ginn an an der Sitzung vum 26. Abrëll ass de Rapport eestëmmege ugeholl ginn.

An hirem Wäissbuch zur europäescher Weltraumnutzung schreift d'Europäesch Kommission awer schonn, dass grad déi friddlech Notzung vum den Erkenntnisser aus der Weltraumfuerschung ee qualitative Sprong fir d'Europäesch Unioin duerstellt, an dat op sozialem, technologeschem, wirtschaftlechem Plang.

D'Memberschaft vu Lëtzebuerg bei der ESA gëtt eis also ganz vill Méiglechkeeten, eis elo mat eranzebréngen. Si ass eng logesch Suite vum dem sou genannte Programm ARTES, engem Fuerschungsprogramm fir Telekommunikatioun. Eleng fir dee Projet gëtt Lëtzebuerg an de Joren 2000 bis 2006 zwoielef Milliounen Euro aus. Mä duerch de Bäitritt zur ESA kënn dann awer den ARTES zu Enn, no der Transitionsphas vu sechs Joer.

D'europäesch Weltraumagence ass gegrënnt ginn am Joer 1975. Si

war e Pendant zur amerikanescher NASA. Wuelverstanen, d'ESA ass friddlechen Zwecker zougewant, wou d'NASA deelweis och militäresch Zwecker verfollegt.

D'Haaptaufgab ass a bleift kloer, eng Kooperatioun ze maachen tëschent allen europäesche Länner fir d'Notzung vum Weltraum. Lëtzebuerg wäert elo als dat lescht vum de 15 europäesche Länner, no Griechenland, och dësem Club da bäitrieden. Et gëtt eng „task force“ geschaaft zwëschent der ESA a Lëtzebuerg, fir ebe während sechs Joer eis drop virzebereeden.

D'ESA selwer ass och eng europäesch Gemeinschaft, well si huet nämlech Zentren an Holland, an Däitschland, an Italien an an der Belsch. Duerch dës Adhësioun kann och Lëtzebuerg dann nach méi staark an d'Telekommunikatioun an an de Satellitteberäich eraklappen. Dat hëlleft eis onsen Deel an enger globaliséierter Welt bäizesteieren; an notament de Mediaport vu Betzduerf wäert hei e bedeitende Rehaussement erliewen.

Jiddferee weess et och, déi elektronesch Kommunikatiounen per Satellit sinn an de leschte Jore ganz staark ausgebaut ginn, notament am Sënn vum der Wëssensgesellschaft, un déi mir alleguer gleeven. Och doniewent wäert ons Universitéit sech an dësem Gebitt erabrénge, an dat duerch d'Fuerschung an och duerch d'Leier.

Vläicht zwee kleng Projekte vum der ESA aus där villen, grousser Serie erausgepickt: Dat ass engersäits den HUBBLE-Projet, mat deem mir lo bal un d'Enn vum eisem Weltraum kënnen kucken, an dann déi sou genannt METEOSATelliten an och den ENVISATellit. Engersäits kënnen mer d'Wieder kontrolléieren, erofspille loosse, an anerersäits kënnen mer Klimadaten ophuelen an eis Ressourcen naturelles op der Äerd besser gestionnéieren.

An och kënnen mer am Speziellen de Kyotoprotokoll iwwerwaachen. An aus deem Projet wüsst erm een neien raus, de sou genannte GMES, de Global Monitoring Environment Security Programm.

Wat nun de finanziellen Impakt fir Lëtzebuerg ubelaangt, et ass ee ganz modesten. Mir klappen do era mat engem Adhësiounsbeitrag vum nëmme 700.000 Euro. A well awer d'ESA selwer tëschent obligatoreschen an och fakultative Projekten a Programmen ënnerscheet, bezuele mer nëmme fir déi obligatesch Projekten 0,21% vum Bruttoinlandprodukt, dat sinn 1,2 Milliounen, fir am Laf vum Joer bei Projekte matzemaachen.

Interessanterweis awer - d'ESA ass éierlech mat ons - huet se de „juste retour“, dat heescht si passt op, dass keen, wann ee Geld investéiert doranner, ze vill bezilt. No fënnef Joer gëtt de Kont gemaach an da gëtt zu engem Land gesot: Du hues méi investéiert, elo kans du dech méi a Projekte bedeelegen, fir dass de „juste retour“ agehale ka ginn.

90% vun den abezuelte Mëttele fléisst souwisoer erm zrëck an d'Industrie européenne, fir eis méi staark an der Weltraumnutzung ze maachen. Mir kréien domat e beseren Zougang zum Wëssen an enger Technologie op engem Marché, wou sech niewent den Amerikaner mëttlerweil och d'Chineesen, d'Japaner an d'Brasilianer breet maachen.

Ee ganz spezielle Punkt wëll ech och dem GALILEO-Projet dann zoumudden. Mir kréien domadder d'Chance, dass mer eis an der zweeter Generatioun vum de sou genannten Telekommunikations- a Satellitennavigationsprojete kënnen bedeelegen.

D'Europäesch Unioin kritt endlech eng Méiglechkeet sech lasszekapelen vum dem amerikanesche GPS; déi Méiglechkeete kréie mer elo. Interessanterweis awer musse mer 30 Satellitten eropschëssen; 27, déi mer direkt brauchen, dräi an der Reserv. An déi ginn an enger Héicht iwwer Europa getässelt vum 23.000 km. An duerch d'Triangulatioun, duerch d'Spill vun dräi Satellitte kënnen mer einwandfräi ons Positiounen festleeën.

Interessant gëtt dat op alle Fall fir de Stroosseverkéier, fir de Schëffs-verkéier an och zum Beispill fir d'Landwirtschaft. Et kann ee sech virstellen, dass iergendwann eng Kéier de Bauer mat engem Empfänger op sengem Trakter fiert a genee weess, duerch e Piepser: Elo sinn ech um Enn vu mengem Kadasterplang ukomm. Dat kann alles gemaach ginn, wann dee Projet hei duerchgeet.

Am Ganze schätze se 140.000 nei Aarbechtsplazen, eleng an deem Beräich GALILEO. Lëtzebuerg wäert der bestëmmt och dovunner kréien.

Ee leschte Volet awer nach, ee wichtige Punkt war den Avis vum Statsrot. De Statsrot huet gemengt a senger Liesung vum dësem Projet de loi, mir kéinten hei eventuell en Transfert de souveraineté erliden. Dat wier de Fall gewiescht wa mir duerch d'Adoptioun vum Joresbudget vum dem Conseil vum der ESA all Décisiounen missten droen. Dofir wär dann den Artikel 114, Ali-néa 2, vum der Verfassung an d'Spill komm. Och de Ministère huet dat an der Chamberskommission gesot, war awer enger anerer Meinung, huet awer herno gemengt aus juristesche Grënn an och weinst den Délaïé sollte mer eis awer dem Statsrot sengem Avis da ralliéieren. Soss hätte mer vläicht riskéiert, dass bei deenen éischten Opträg, déi elo vergi ginn, Lëtzebuenger Entrepenen net méi dobäi hätte kënnen sinn.

Duerch de Bäitritt vu Lëtzebuerg bei d'ESA kënn et zu enger „added value“ op verschiddene Pläng, op dem wëssenschaftlechen, dem technologeschen, dem industriellen an och dem wirtschaftleche Beräich. Grad an der Rumm vum der Lissabonstrategie muss een dëse Schrëtt begrëissen, well mer elo einwandfräi op de Wee vum där sou genannter performerter Wëssensgesellschaft higin.

Mëttlerweil huet sech awer och schonn an eisem Land e Grupp vum dynamesche Mënschen aus der Wirtschaft beieneegesat an eng Plattform gegrënnt, de GLAE. Hir Aufgab a Missioun wäert da sinn, d'Notzung vum der europäescher Weltraumfuerschung nach méi op Lëtzebuerg ze axéieren an domadder och e weideren Ausbau vum eiser dynamescher Wirtschaft erbäizebréngen.

Grad elo brauch Lëtzebuerg Mënsche mat enger Visioun, grad elo wou mer wëssen, dass d'industriell Standbeen net méi esou fest ass, wou onse Bankeberäich och an enger globaliséierter Welt sech nei muss positionéieren, musse mer nei Weeër goen. An nei Weeër sinn hei mat der ESA de Weltraum mat eranzebréngen op eng friddlech Aart a Weis ze notzen.

Interessanterweis zum Schluss dann: Mir klappen hei an d'ESA eran, an engem Joer, wou mer de 50. Doudesdag feiere vum Albert Einstein. Dee Mënsch, deen eis duerch seng Relativitéitstheorie de Weltraum opgemaach huet. An den 100. vum Jules Verne, dem éischte Visionär, deen a sengem Buch „Vun der Äerd op de Mound“ eis déi Saach schonn e bësse virgezechent huet.

Ech hunn am Ufank gesot: Ee klenge Schrëtt fir de Mënsch, ee gewaltege fir eis Gesellschaft. An ech mengen, och elo dierf Lëtzebuerg no de Stäre gräifen.

Ech soen lech Merci fir d'No-lauschteren.

Plusieurs voix.- Très bien.

M. le Président.- Merci, Här Rapporteur. Als éischte Riedner hu mer den honorabelen Här Lucien Thiel. Här Thiel, Dir hutt d'Wuert.

Discussion générale

M. Lucien Thiel (CSV).- Här President, Kolleeginnen a Kolleegen, dat Gesetz, dat mir elo stëmme sollen, geet - an den Här Marcel Oberweis huet et schonn uge-deit - zimlech wäit iwwert d'Rentabilitéitsconsidérations raus, déi een am Zesummenhank mat enger Membership vu Lëtzebuerg an der europäescher Raumfahrt-agence ESA ka maachen.

A sengem grëndleche schrëftlechen an net manner interessante mëndleche Rapport huet mäi Kolleeg Marcel Oberweis och schonn op déi gesamtwirtschaftlech Auswirkungen vum der ESA-Memberschaft higewisen. Déi soll een effektiv net ënnerschätzen.

Dofir erlaabt mir dëse Projet an dee méi breede Kontext vum der ekonomescher Entwécklung vum eisem Land ze setzen.

Mir Lëtzebuenger gehéiere jo bekanntlech zu deene räichsten Nationen vum der Welt. Mir sinn zwar net d'Nummer 1, wéi d'OCDE ëmmer behaupt - well déi vergësst jo ëmmer d'Frontaliere mat anzerechnen -, mä mir sinn am Spëtzepeleton. Dat war schonn an der éischter Halschent vum vergaangene Jorhonnert de Fall, wéi mer dee si-wentgréisste Stolproduzent vum der Welt waren an domat méi wéi genuch Sue verdéngt hunn, fir eis ekonomesch a vläicht och politesch iwwer Waasser ze halen an eis Eegestaatlechkeet ze behalen.

Duerno si mer déi aachtgréisst Finanzplaz vum der Welt ginn. Gott sei Dank just zur Zäit, fir iwwert déi batter Restrukturierung vum eiser Stolindustrie ewechkommen, déi ënner aneren Ëmstänn wuel zu enger nationaler Katastroph gefouert hätt. Vun de 70er Joren un hu mir do ganz bequeme vum de Revenu vum eiser Finanzplaz geliefert, déi lues a lues esou eng Aart Selbst-verständlechkeet fir eis ginn ass.

Mir hunn eis ouni weideres un de Gedanke gewinnt, datt den Herrgott e Lëtzebuenger wier, a mir domat fir ëmmer op der gewonnener Sait wieren. Dat huet och méi oder weiniger bis viru kuerzem geklappt. Mä säit enger Zäit trëppele mir mat eise Banken op der Plaz. Ënner anerem och dofir, well eis Noperen eis net méi esou gewäerde loosse wéi fréier. Fir de Moment gesäit et jiddefalls net no enger Neioplo vum Boom vum den 90er Joren aus, wou mer Zouwuersrate bis zu 10% an engem Joer haten.

Derbäi gi mer eis och nach méi bewosst, wéi ofhängeg mir vum deem enge Secteur gi sinn, deen eleng, trotzdem hien e bëssen ageknéckst ass, nach ëmmer een Drëttel vum eisem Statsbudget finanzéiert.

Do geet et net méi duer mat e bëssen Diversifizierung hei an e bësse Steueravantages do, wa mir eis ekonomesch Zukunft op e sécher Fëllement wëlle setzen. Mir mussen eis, ob mer wëllen oder net, no Alternativen ëmkucken, déi dofir suergen, datt mir eis eisen Train de vie weider leeschte kënnen, wann et mol eng Kéier méi lues mat eiser Finanzplaz goe sollt. Ofgesinn do-vu wier et och e méi berouegend Gefill, wa mir net méi esou ofhängeg wiere vum engem eenzelne Wirtschaftssektor, wéi mir et am Moment vum der Finanzplaz sinn.

Elo kann een awer net esou einfach en neie Wirtschaftscréneau aus dem Zylinder zauberen. Esou eppes kritt een - wann iwwerhaapt - nëmmen a laanger an haarder Klengaarbecht zustanen. Ongefëier sou wéi wann een e grouse risige Puzzel géif zesummebastelen. Mir hu jo scho méi där Uleef geholl, fir eis Economie ze diversifizéieren a wann een dovunner voll